

都勻縣志稿卷七

大事志 年紀

古者諸侯咸有國史晉乘楚檇杙魯春秋其著也春秋魯史舊名孔子因而修之故曰其事則齊桓晉文其文則史左氏以傳翼經兼史為裁遂開史家編年之體二百四十二年列邦治亂興廢朝聘征伐妖祥災變之跡畢具簡策非方志之極則耶史職廢久矣方州瑣聞罔羅末由惟理亂之跡必紀太常爰稽載籍肇周迄清舉著見可徵信者著於篇久則論略理勢宜然罅漏補苴以俟來哲

周

襄王元年牂柯始朝于齊據管子

牂柯古淪荒服蠻獠聚族而居相為雄長不臣中國東周以還楚浸强大遂屬於

楚齊桓既霸及楚盟于召陵於時遐邇懾服罔不率俾牂柯之通上國自此始也

赧王三十八年楚頃襄王二十二年秦昭王三十年楚將莊蹻後漢書作莊豪泝沅克夜郎遂西略地

西南夷君長以什數夜郎最大在蜀郡徼外東接交趾西隣滇國其國臨牂柯江

牂柯江即今都江詳輿地志江廣數里出番禺城下文獻通考始楚頃襄王使將軍莊蹻將兵循江

都勻縣志稿卷七 年紀

上略巴蜀黔中以西莊蹻者故楚莊王苗裔也蹻後王滇遂大分侯支黨傳數百年自夜郎滇池以西皆其裔也

秦

始皇三十三年略取南越地置象郡通鑑

南越芋姓與楚同祖多居山陸間性强梁帝發諸嘗通亡人及贅壻賈人為兵略

之置郡以徙謫民鄭氏珍曰南越即百越亦曰揚越俱見史記漢書注云南越芋姓與楚同祖國語曰芋姓變越是也山海經云沅水出象郡此

條據畢氏攷証為漢人水經並非三代舊文是知今貴州之平越州都勻府皆古越地秦之象郡地漢昭帝元鳳五年紀有罷象郡分屬鬱林牂柯之文是其明証

漢

武帝元光五年通南夷置犍為郡通鑑夏發巴蜀治南夷道漢書武帝紀

建元六年大行王恢擊東越按本紀在六年八月東越殺王郢以報恢因兵威使番陽令唐

蒙風指曉南越漢書越皆作粵南越食蒙枸醬蒙問所從來曰道西北牂柯牂柯江廣數

里出番禺城下蒙歸至長安問蜀賈人賈人曰獨蜀出枸醬多持竊出市夜郎夜

郎者臨牂柯江江廣百餘步足以行船南越以財物役屬夜郎西至桐師然亦不

能臣使也蒙乃上書說上曰南越王黃屋左纛地東西萬餘里名為外臣實一州

主也今以長沙豫章往水道多絕難行竊聞夜郎所有精兵可得十餘萬浮船牂柯江出其不意此制越一奇也誠以漢之疆巴郡之饒通夜郎道爲置吏甚易上許之乃拜蒙爲中郎將將千人食重萬餘人從巴蜀筰關入漢書云從巴筰關入遂見夜郎侯多同蒙厚賜喻以威德約爲置吏使其子爲令夜郎旁小邑皆貪漢繒帛以爲漢道險終不能有也乃且聽蒙約還報乃以爲犍爲郡發巴蜀卒治道自犍道指牂柯江卒多物故有逃亡者用軍興法誅之

六年南夷始置郵亭

史記集解徐廣說

元朔三年罷西夷置南夷夜郎兩縣一都尉

漢書武帝紀

初唐蒙方事南夷蜀人司馬相如亦言西夷印筰可置郡使相如以中郎將往諭皆如南夷爲置一都尉十餘縣屬蜀當是時巴蜀四郡通西南夷道成轉相饜數歲道不通士罷餓離濕死者甚衆西南夷又數反發兵興擊耗費無功上患之使公孫宏往視問焉還對言其不便及宏爲御史大夫是時方築朔方以據河逐胡宏因數言西南夷害可且罷專力事匈奴上罷西夷獨置南夷夜郎兩縣一都尉

史記西夷傳

都勻縣志稿卷七

紀事

元狩元年遣博望侯張騫指求身毒始通滇國復事西南夷

張騫使大夏來言臣在大夏時見印竹杖蜀布問安得此大夏國人曰吾賈人往市之身毒身毒國在大夏東南可數千里其俗土著與大夏同而卑濕暑熱其民乘象以戰其國臨大水焉以騫度之大夏去漢萬二千里居西南今身毒又居大夏東南數千里有蜀物此其去蜀不遠矣今使大夏從羌中險羌人惡之少北則爲匈奴所得從蜀宜徑又無寇天子旣聞大夏之屬皆大國多奇物土著頗與中國同俗而兵弱貴漢財物誠得而以義屬之則地廣萬里威德徧四海欣欣以騫言爲然乃令因蜀犍爲發間使四道並出出驩出犍出徙印出犍皆各行一二千里其北方閉氏犍南方閉昆明昆明之屬無君長善寇盜輒殺略漢使終莫得通然聞其西可千餘里有乘象國名滇越而蜀賈間出物者或至焉於是漢以求大夏道始通滇國初漢欲通西南夷費多罷之及騫言可以通大夏迺復事西南夷

漢書張騫傳

元鼎五年夏四月南越王相呂嘉反秋遣越馳義侯遺應劭曰越人也別將巴蜀罪人發夜

郎兵下牂柯江會番禺

漢書武帝紀

南越反上使馳義侯因犍爲發南夷兵且蘭君恐遠行旁國虜其老弱乃與其衆反殺使者及犍爲太守漢乃發巴蜀罪人嘗擊南越者八校尉擊破之南夷傳

六年冬平南夷置牂柯郡漢書武帝記

南越破漢八校尉不下中郎將郭昌衛廣引兵還行誅隔滇道者且蘭斬首數萬

遂平南夷爲牂柯郡漢書

元封元年分犍爲屬牂柯郡華陽國志言置牂柯在此年與史記漢書異意此但分犍爲來屬常氏誤爲一事耳

自此讐自犍爲來屬牂柯符仍屬犍爲遵義府志

二年分牂柯置益州郡華陽國志

二年六月遣將軍郭昌中郎將衛廣發巴蜀兵平西南夷未服者以爲益州郡漢書

武帝紀割牂柯越嶲各數縣配之後漢書西南夷傳

昭帝始元元年牂柯談指同並反遣水衡都尉呂破胡擊破之

元年夏益州廉頭姑繒民反殺長史牂柯談指同並二十四邑凡三萬餘人皆反

遣水衡都尉發蜀郡犍爲犇命萬餘人擊牂柯大破之應劭曰舊時郡國皆有材官騎士以赴急難今夷反

兵常不足以討之故權選取精勇開命奔走故謂之犇命漢書西南夷傳

都勻縣志稿卷七

紀事

三

元鳳五年秋罷象郡分屬鬱林牂柯漢書昭帝紀

成帝河平中牂柯太守陳立討夜郎平之鈞町漏臥皆降

夜郎始倚南越南越已滅會還誅反者遂入朝詔以爲夜郎王時元鼎六年也昭

帝始元六年鈞町亡波率其邑君長人民擊反者斬首捕虜有功詔以爲鈞町王

至是夜郎王興鈞町王禹漏臥侯俞更舉兵相攻牂柯太守請發兵誅興等議者

以爲道遠不可擊乃遣大中大夫蜀郡張匡持節和解興等不從命刻木象漢吏

立道旁射之杜欽說大將軍王鳳曰大中大夫匡使和解蠻夷王侯王侯受詔已

復相攻輕易漢使不憚國威其效可見恐議者選與復守和解太守察動靜有變

迺以聞如此則復曠一時王侯得收獵其衆深固其謀黨助衆多各不勝忿必相

殄滅自知罪成狂犯守尉遠滅溫暑毒草之地雖有孫吳將賁育士若入水火往

必焦沒知勇無所施屯田守之費不可勝量宜因其罪惡未成未疑漢家加誅陰

敕旁郡守尉練士馬大司農豫調穀積要害處師古曰要害者在我也選任職太守

往以秋涼時入誅其王侯尤不軌者即以爲不毛之地亡用之民聖王不以勞中

國宜罷郡放棄其民絕其王侯勿復通如以先帝所立累世之功不可墮壞亦宜

萌芽早斷絕之及已成形然後戰師則萬姓被害大將軍鳳於是薦金城司馬陳立爲牂柯太守立者臨邛人前爲連然長不韋令蠻夷畏之及至牂柯諭告夜郎王興興不從命立請誅之未報迺從吏四十人出行縣至興國且同亭召興興將數千人往至亭從邑君數十人人見立立數責因斷頭邑君曰將軍誅亡狀爲民除害願出曉士衆以興頭示之皆釋兵降鈞町王禹漏臥侯僉震恐入粟千斛牛羊勞吏士立還歸郡興妻父翁指與興子邪務收餘兵迫脅旁二十二邑反至冬立奏募諸夷與都尉長史分將攻翁指等翁指據阨爲壘立使奇兵絕其饗道縱反間以誘其衆都尉萬年曰兵久不決費不可共引兵獨進敗走趨立營立怒叱戲下令格之都尉復還戰立引兵救之時天大旱立攻絕其水道蠻夷共斬翁指持首出降

漢書西南夷傳

平帝元始四年冬更十二州名分界

按通鑑輯覽據帝紀舉更官名繫此年參之莽傳更官名在僭國後今改從傳

時王莽專政謂堯典有十二州後定爲九州漢家廓地遼遠州牧行部遠者三萬餘里不可爲九乃以經義正十二州名分界以應正始從之

後漢書莽傳

新莽始建國元年正月更官名降漢諸侯王及王子侯爵

都勻縣志稿卷七

紀事

四

莽初卽位置大司馬司允大司徒司直大司空司若位皆孤卿更名大司農曰羲和後更爲納言大理曰作士太常曰秩宗大鴻臚曰典樂少府曰共工水衡都尉曰予虞與三公司卿凡九卿分屬三公每一卿置大夫三人一大夫置元士三人凡一十七大夫八十一元士分主中都諸職更名光祿勳曰司中太僕曰太御衛尉曰太衛執金吾曰奮武中尉曰軍正又置大贅官主乘輿服御物後又典兵秩位皆上卿號曰六監改郡太守曰大尹都尉曰太尉縣令長曰宰四夷僭號稱王者皆更爲侯遣五威將奉符命齎印綬四出王侯以下及吏官名更者

師古曰外更改也

四年西南夷殺牂柯大尹

通鑑輯覽

初五威將帥出改句町王以爲侯王邯怨怒不附

師古曰邯句町王之名也

莽諷牂柯大尹周

歆詐殺邯邯弟承起兵攻殺歆於是西南夷皆亂

漢書王莽傳

五年七月莽置萬國改郡縣名

莽以周官王制之文置卒正連帥大尹

如太守

屬令屬長

如都尉

州牧

如三公

分六卿

長安

旁城

六尉

三輔衆縣

六隊

河南河東

弘農南陽

又倣古爲六服

惟城垣九

惟州之

惟寧外

曰惟

惟屏惟

惟

總為萬國以應符命文郡縣以亭名者三百六十詳柯莽曰同亭其後歲復變更
一郡至五易名而還復其故吏民不能紀每下詔書輒繫其故名云通鑿輯覽
後漢

光武建武元年牂柯郡功曹謝暹入貢

時公孫述稱帝牂柯大姓龍傅尹董氏與郡功曹謝暹保境為漢乃遣使從番禺

江奉貢光武嘉之並加褒賞後漢書西

六年初罷郡國都尉官後漢書本記遵義府

十八年罷州牧置刺史後漢書帝紀注云武帝元封五年初置十三部刺史掌奉詔條

平二年復為刺史元壽二年復為牧經王莽變革至建武元年復置牧今改刺史

初武帝置十三部刺史改梁曰益犍為牂柯並屬益州至是名雖屢更犍牂之屬

仍舊遵義府志

靈帝熹平五年益州郡叛太守李顛討平之後漢書本紀

中平五年益州黃巾馬相攻殺刺史郗儉自稱天子又寇巴殺郡守趙部益州從事

賈龍擊相斬之後漢書本紀

都勻縣志稿卷七

紀事

改刺史新置牧同上遵義府志以劉焉領益州牧華陽國志

焉漢魯恭王後裔少仕州郡以宗室拜中郎後以師祝公喪去官居陽城山積學

教授舉賢良方正辟司徒府歷雒陽令冀州刺史南陽太守宗正太常觀靈帝政

治衰缺王室多故內求交趾牧欲避世難議未即行侍中廣漢董扶私謂焉曰京

師將亂益州分野有天子氣焉聞扶言意更在益州會前刺史郗儉賦歛煩擾乃

以焉為益州刺史勅至州收儉治罪以道路不通住荊州東及賈龍破走黃巾乃

選吏卒迎之

獻帝興平元年劉焉卒除劉璋領益州牧華陽國志

劉焉卒州大吏趙韙等貪璋溫仁共上璋為益州刺史詔從之

建安十八年春正月復禹貢九州後漢書本紀

時省幽并州以其郡國并於冀州省司隸校尉及涼州以其郡國并為雍州省兗

州并荊州益州於是有兗豫青徐荆揚冀益雍也九數雖同而禹貢無益州有梁

州然梁益亦一地也獻帝春秋

十九年夏五月劉備破劉璋據益州後漢書本紀

先是劉璋遣其將吳懿等拒備皆敗退諸軍降備遂分定諸縣進圍雒城至是諸葛亮留關羽守荊州與張飛趙雲泝流克巴東破巴郡獲太守嚴顏備圍雒城且一年龐統中流矢卒法正賤與劉璋曰左將軍舊心依依實無薄意可圖變化以保尊門璋不答雒城潰備進圍成都亮飛雲引兵來會馬超知張魯不足與計事亦來請降備令引兵屯城北城中震怖璋遂開城出降備遷璋公安盡歸其財物佩以振威將軍印綬備入成都自領益州牧以諸葛亮為軍師將軍時董和黃權李嚴等本璋所任用吳懿費觀等皆璋之姻親彭義璋所擯棄劉巴宿昔所忌恨皆處之顯任盡其器能有志之士無不競勸益州之民是以大和

通鑑輯覽

蜀漢

昭烈帝章武元年以李恢

字德昂建寧人

為庾降都督治平夷

資治通鑑注平夷縣屬牂柯郡庾降督住平夷蓋僑

治非庾降之本也至馬忠為庾降都督乃自平夷移住建寧味縣後遂為寧州治所

初先主領益州牧以恢為功曹書佐主簿後為亡虜所誣引恢謀反有司執送先主明其不然更遷別駕從事章武元年庾降都督鄧方卒先主問恢誰可代者恢對曰人之才能各有長短故孔子曰其使人也器之且夫明主在上則臣下盡情

都勻縣志稿卷七

紀事

六

是以先零之役趙充國曰莫若老臣竊不自揆惟陛下察之先主笑曰孤之本

意亦已在卿矣遂以恢為庾降都督使持節領交州刺史住平夷縣

蜀志本傳

三年夏四月帝崩于永安丞相亮受遺詔輔政五月太子禪即位改元大赦封亮為

武鄉侯領益州牧

通鑑輯覽

帝初即位恥關羽之沒遂自將擊孫權

事在元平七月

二年夏六月敗於猇亭引還魚復

改魚復縣曰永安三年春二月寢疾丞相亮至永安帝謂亮曰君才十倍曹丕必

能安國終定大事若嗣子可輔輔之如其不才君可自取亮涕泣曰臣敢不竭股

肱之力效忠貞之節繼之以死先主又為詔勅後主曰汝與丞相從事事之如父

夏四月癸巳殂於永安諡曰昭烈丞相亮奉喪還成都以李嚴為中都護留鎮永

安五月太子禪即位大赦改元建興封丞相亮為武鄉侯領益州牧政事無巨細

咸取決焉

後主建興元年夏牂柯太守朱褒擁郡反

蜀志本紀

初益州郡耆帥雍闓殺太守正昂因士燮

按通鑑士燮交州太守

以求附於吳又執太守成

都張裔以與吳吳以闓為永昌太守永昌功曹呂凱府丞王伉率吏士閉境拒守

闔不能進使郡人孟獲誘扇諸夷諸夷皆從之并柯太守朱褒越嵩夷王高定皆叛應闔諸葛亮以新遭大喪皆撫而不討務農殖穀閉關息民民安食足然後用之資治通鑑

三年春三月丞相亮南征四郡四郡皆平改益州郡爲建寧郡分建寧永昌郡爲雲南郡又分建寧牂柯爲興古郡蜀志本紀

亮率衆討雍闓參軍馬謖送之數十里亮曰雖共謀之歷年今可更惠良規謖曰南中恃其險遠不服久矣雖今日破之明日復反耳今公方傾國北伐以事疆賊彼知官勢內虛其叛亦速若殄盡遺類以除後患既非仁者之情且又不可倉卒也夫用兵之道攻心爲上攻城爲下心戰爲上兵戰爲下願公服其心而已亮納其言至南中所在戰捷亮由越嶲入斬雍闓及高定使康降督益州李恢由益州入門下督巴西馬忠由牂柯入擊破諸縣復與亮合孟獲收闔餘衆以拒亮獲素爲夷漢所服亮募生致之既得使觀於營陳之間問曰此軍何如獲曰向者不知虛實故敗今蒙賜觀營陳若祇如此即定易勝耳亮笑縱使更戰七縱七禽而亮猶遣獲獲止不去曰公天威也南人不復反矣亮遂至滇池益州永昌牂柯越嶲

都勻縣志稿卷七

紀事

七

四郡皆平亮即其渠率而用之或以諫亮亮曰若留外人則當留兵兵留則無所食一不易也加夷新傷破父兄死喪留外人而無兵者必成禍患二不易也又夷累有廢殺之罪自嫌釁重若留外人終不相信三不易也今吾欲使不留兵不運糧而紀綱粗定夷漢粗安故耳亮於是悉收其俊傑孟獲等以爲官屬出其金銀丹漆耕牛戰馬以給軍國之用自是終亮之世夷不復反資治通鑑

十一年以馬忠爲康降都督

通鑑

康降都督張翼

字伯恭據爲武陽人

持法嚴不得殊俗之歡心耆率劉胄背叛作亂翼舉兵

討胄胄未破丞相亮以參軍馬忠代翼徵翼還羣下咸以爲宜便馳騎即罪翼曰不然吾以蠻夷蠢動不稱職故還耳然代人未至吾方臨戰場當運糧積穀爲滅賊之資豈可以黜退之故而廢公家之務乎於是統攝不懈代到乃發忠因其資破胄斬之先是建寧郡殺太守正昂縛太守張裔於吳故都督常駐平夷縣至忠乃移治味縣處民夷之間蜀志翼忠傳

晉

武帝泰始六年閏五月詔南中諸郡無出今年戶調

晉書本紀

咸寧三年夏六月益梁八郡水殺三百餘人沒邸閣別倉秋九月竟豫徐青荆益梁七州大水傷秋稼詔振給之

太康三年罷寧州置南夷校尉

華陽國志

四年夏六月牂柯二千餘落內屬

十年冬十二月西南夷二十餘國來獻

晉書本紀

惠帝太安元年復置寧州增統牂柯益州朱提

李毅爲南夷校尉建寧太守杜俊朱提太守雍約懦鈍無治政以賄成俊奪大姓

鐵官令毛詵中郎李督

後賢志作着

部曲致詵弟耐罪朱提大姓大中大夫李猛有才

幹弟爲功曹分當察舉而俊約受都尉雷逢賂舉逢子炤孝廉不禮猛等怨之

太安元年秋詵督猛逐俊以叛猛亦逐約應之作亂衆數萬毅討破之斬詵首督

走依遑耶五茶夷帥于陵承猛箋降曰生長遐荒不達禮教徒與李雄和光合勢

雖不能營師五丈略地涓濱冀北斷褒斜東據永安退攻靈符晉德長久誠非狂

夫所能干輒表革面歸罪有司毅惡其言遂誘殺之行部永昌從事江陽孫辨上

南中形勢七郡斗絕晉弱夷強加其土人屈寒應復寧州以相鎮慰冬十一月丙

都勻縣志稿卷七

紀事

八

戊詔書復置寧州增統牂柯益州朱提合七郡爲刺史加龍驤將軍進封成都縣

侯

華陽國志南中志

懷帝光熙元年春三月寧州刺史李毅卒毅女秀權領州事討夷亂平之

先是于陵承詣毅請恕督罪毅許之

事在太安二年

督至羣下以爲詵督破亂州土必殺

之毅不得已許諾及死督于陵承及詵

詵字終術

猛遑耶扇動謀反奉建寧太守巴西

馬恢爲刺史燒郡僞發毅方疾作力出軍初以救恢及聞其情乃殺恢夷愈強盛

破壞郡縣役吏民會毅疾甚軍運不利晉民或入交州或入永昌牂柯半亦爲夷

所困虜夷因攻圍州城毅但併力固孤城病篤不能戰討時李特李雄作亂益州

而所在有事救援莫至毅上疏陳謝不能式遏寇虐疾與事遇使虜游魂兵穀旣

單器械窮盡而求救無望坐待殄斃若必不垂矜憂乞請大使及臣尙存加臣重

罪若臣已死陳屍爲戮光熙元年春三月毅薨子釗任洛還赴到牂柯路塞停住

交州文武以毅女秀明達有父才遂奉領州事秀初適漢嘉太守廣漢王載將家

避地在南故共推之又以載領南夷龍驤參軍秀獎勵戰討食糧已盡人但茹草

炙鼠爲命秀伺夷怠緩輒出軍掩破首尾三年釗乃得達丁喪文武復逼釗領州

永嘉四年以王遜為甯州刺史

四年李毅治中毛孟詣京師求刺史不見省孟固陳曰君亡親喪幽閉窮城萬里
訴哀不垂愍救既愆包胥無哭秦之感又愧梁妻無崩城之驗存不若亡乞賜臣
死朝廷憐之乃以遜為南夷校尉甯州刺史使於郡使之鎮遜與孟俱行道遇寇
賊踰年乃至外逼李雄內有夷寇吏士散沒城邑邱墟遜披荒糾厲收聚離散杖
威刑鞭撻殊俗遜未到州遙舉董聯為秀才建甯功曹周悅謂聯非才不下版檄
遜既到收悅殺之悅弟潛謀殺遜以前建甯太守趙混子濤代為刺史事覺並誅
之又誅豪右不奉法度者數十家征伐諸夷俘馘千計獲馬及牛羊數萬餘於是
莫不振服威行甯土 晉書王遜傳

五年分牂柯置平夷夜郎二郡

郡志云永嘉二年分牂柯立平夷夜郎二郡又愍紀建興四年有平夷太守雷燭永嘉
建興皆在元帝前何至元帝時始分郡乎然二書並言分郡自王遜傳曰遜以地勢
形便上分牂柯為平夷郡云云事施行而遜以永嘉四年毛孟之請乃為南夷校尉
州刺史且道遇寇賊踰年乃至華陽志亦云遜以永嘉元年除授四年乃至則遜至鎮
時已是永嘉四五年間又不應二年已分郡蓋晉志二年乃五年之誤宋書志平蠻太

都勻縣志稿卷七

年紀

九

守永嘉五年王遜分立可證華陽志云元帝乃愍帝之誤志又於平夷郡下云元
帝建興元年置亦愍帝之誤元帝無建興元而有太興所由來矣水經延江水注
晉建興元年置平夷郡知謂愍帝也至晉志常書前後異一年者永嘉
五年據上形便之時建興元年據下施行為說始事成事兩不相妨也

初漢武帝平且蘭置牂柯郡領縣十七

故且蘭平夷毋歛同竝談指宛溫漏

江西南陽郡 桑後漢書作進乘 句町

光武併省郡縣於牂柯省都夢蜀漢時分句町宛溫

漏臥進乘諸縣隸興古郡分談彙母單漏江諸縣隸建甯郡於是牂柯郡領縣七
至王遜為甯州刺史以地勢形便上分牂柯為平夷郡而以警縣屬之分建甯為
夜郎郡而以談指 宋書作 屬之於是牂柯領縣四 萬壽廣談 且蘭 毋歛 廣談初名並渠
太康時牂柯獠舉眾內屬以其地置者也漢置舊縣至是仍隸牂柯者僅餘三縣
矣

愍帝建興四年夏五月平夷太守雷焯害南廣太守孟桓北降李雄

晉書本紀

寧州刺史王遜嚴猛喜誅殺五月平夷太守雷焯平樂太守董霸帥三千餘家叛

降於成

資治通鑑

元帝永昌元年八月王敦以其兄含為衛將軍自領甯益二州都督

晉書本紀

時劉隗用事頗疎間王氏敦疏爭辯帝銜之引劉隗刁協為心膂謀禦敦永昌元

年敦以誅隗爲名率衆內向戰於石頭王師敗績遂收周顛戴若思害之帝使太常荀崧就拜敦爲丞相江州牧進爵武昌郡公邑萬戶加羽葆鼓吹並僞讓不受還屯武昌多害忠良寵樹親戚遂以兄含爲衛將軍都督沔南軍事領南蠻校尉荊州刺史自督寧益二州晉書王敦傳

成帝咸和二年春正月寧州秀才龐遺起兵攻李雄將任回李謙等雄遣其將羅恒費黑救之寧州刺史尹奉遣裨將姚岳朱提太守楊術援遺戰於臺登岳等敗績術死之晉書本紀

八年春三月景寅李雄將李壽陷寧州刺史尹奉及建寧太守霍彪並降之晉書本紀

初寧州刺史王遜卒州人復立遜中子堅行州府事陶侃懼堅不能對抗蜀人表以零陵太守尹奉爲寧州晉書王遜傳奉威刑緩鈍政治不理咸和七年成大將軍李

壽寇寧州以其征東將軍費黑爲前鋒出廣漢鎮南將軍任回出越雋以分寧州之兵冬十月壽黑至朱提朱提太守董炳城守寧州刺史尹奉遣建寧太守霍彪引兵助之壽欲逆拒黑曰城中食少宜縱彪入城共消其穀何爲拒之壽從之城久不下壽欲急攻之黑曰南中險阻難服當以日月制之待其知勇俱困然後取

都勻縣志稿卷七

年紀

十

之溷牢之物何足汲汲也壽不從攻果不利乃悉以軍事任黑八年春正月成大將軍李壽拔朱提董炳霍彪皆降壽威震南中三月寧州刺史尹奉降於成成盡有南中之地惟牂柯謝恕不爲壽所用遂保郡獨爲晉壽遣鎮東大將軍李奕征之積日不拔會奕糧盡引還

咸康二年冬十月廣州刺史鄧嶽遣督護王隨擊夜郎新昌太守陶協擊興古並克之加嶽督寧州晉書本紀及鄧嶽傳

四年秋八月景午分寧州置安州晉書本紀

初武帝分益州南中之建寧興古雲南永昌四郡置寧州尋省立南夷校尉惠帝太安中復立增統牂柯越雋朱提三郡至是分牂柯夜郎朱提越雋四郡置安州

宋書州郡志

五年春三月乙丑廣州刺史鄧嶽將兵擊漢寧州建寧太守孟彥執其刺史霍彪以降資治通鑑

七年冬十二月罷安州晉書本紀

海西公太和元年夏六月戊子使持節都督寧益二州諸軍事鎮西將軍益州刺史

建城公周撫卒

六年三月壬辰監益寧二州諸軍事冠軍益州刺史建城公周楚卒秋八月以前寧州刺史周仲孫為假節監益梁二州諸軍事晉書本紀

仲孫楚弟光子也興寧初督寧州軍事振武將軍寧州刺史在州貪暴人不堪命

桓溫以梁益多寇周氏世有威稱復除之晉書列傳無仕孫其人按仲孫傳叙其除之之由及

所歷官皆合疑帝紀誤

宋

武帝永初二年冬十月癸卯以員外散騎常侍應襲為寧州刺史

少帝景平元年冬十二月省寧州之江陽犍為安上三郡合為宋昌郡

文帝元嘉五年冬十一月辛卯以安陸公相周籍之為寧州刺史

十五年秋七月甲戌以陳南頓二郡太守徐循為寧州刺史

十八年冬十二月晉寧太守爨松子反叛寧州刺史徐循討平之

十九年冬十月己亥以晉寧太守周萬歲為寧州刺史

二十七年春正月辛未制交寧二州假板郡縣俸祿聽依臺除

都勻縣志稿卷七

年紀

十一

三十年秋八月丁亥以沛郡太守垣閔為寧州刺史

孝武帝建元元年秋九月丙申以彊弩將軍尹懷順為寧州刺史

大明二年秋八月己丑以彊弩將軍杜叔文為寧州刺史

三年夏四月丙午以建寧太守苻仲子為寧州刺史

四年春二月己未以員外散騎侍郎費景緒為寧州刺史

五年秋八月戊子以北中郎參軍費伯弘為寧州刺史

明帝泰始六年夏五月戊子以奉朝請孔玉為寧州刺史

後廢帝元徽二年秋八月辛酉以征虜行參軍劉延祖為寧州刺史

五年春二月壬申以建寧太守柳和為寧州刺史並宋書本紀

順帝昇明二年傅琰假節督益寧二州軍事南齊書良吏傳

南齊

高帝建元元年五月詔遣使分行四方遣兼散騎常侍十二人巡行以交寧道遠不

遣使

武帝永明二年夏五月己巳遵義志作四月乙巳誤以寧朔將軍程法勤為寧州刺史

三年秋七月丁亥以驃騎中兵參軍董仲舒爲甯州刺史

十年秋八月丙申以新城太守郭安明爲甯州刺史

海陵王延興元年秋八月庚戌以車騎板行參軍李慶綜爲甯州刺史

明帝建武三年夏五月乙巳以前新除甯州刺史李慶琮爲甯州刺史

和帝中興元年春三月壬子以征虜將軍柳惔爲益甯二州刺史

梁

武帝大同十一年以徐文盛爲甯州刺史

文盛字道茂彭城人世仕魏爲將父慶之天監初率千餘人自北歸款未至道卒文

盛仍統其衆稍立功績高祖甚優寵之大同末以爲持節督甯州刺史先是州在

僻遠所管羣蠻不識教義貪欲財賄劫篡相尋前後刺史莫能制文盛推心撫慰

示以威德夷獠感之風俗遂改梁書徐文盛傳

隋

文帝開皇初置牂州隋書地理志

梁武帝大清二年侯景舉兵反甯州刺史徐文盛率衆勤王甯州空虛諸郡多爲

都勻縣志稿卷七

年紀

十二

爨氏所據惟牂柯及平夷南陽三郡自守隋平陳并牂柯平夷二郡爲牂州改南

陽郡爲壽州爨藝齋文存

唐

高祖武德三年牂柯首領謝龍羽遣使入朝

昆明東九百里即牂柯國也牂柯蠻東距辰州二千四百里其南千五百里即交

州也無城郭土熟多霖雨稻粟再熟無徭役戰乃屯聚刻木爲契盜者倍三而償

殺人者出牛馬三十首領姓謝氏至龍羽有兵三萬武德三年遣使者朝以其地

爲牂州拜龍羽刺史封夜郎郡公唐書南蠻傳

太宗貞觀三年東謝蠻謝元深入朝置應州

東謝蠻居黔州西三百里南距守宮獠西連夷子地方千里宜五穀爲畚田歲一

易之衆處山巢居汲流以飲無稅刻木爲契見貴人執鞭而拜賞有功者以牛馬

銅鼓犯小罪則杖大事殺之盜物者倍償婚姻以牛酒爲聘女歸夫家夫慙澁避

之旬日乃出會聚擊銅鼓吹角俗椎髻韜以絳垂於後坐必蹲踞常帶刀劍男子

服衫襖大口袴以帶斜繚右肩以螺殼虎豹猿狖犬羊皮爲飾有謝氏世爲酋長

部落尊畏之其族不育女自以姓高不可以嫁人貞觀三年其酋元深入朝冠烏熊皮若注旄以金銀絡額被毛帔韋行縻著履中書侍郎顏師古奏言昔周武王時遠國入朝太史次爲王會篇今蠻夷入朝如元深冠服不同可寫爲王會圖詔可以其地爲應州即拜元深刺史隸黔州都督府

唐書南蠻傳

四年置黔州都督府

黔州隋爲黔安郡武德初改置至是置務督府督府施業辰智牂充莊應等州應州領都尙婆覽應江阨隆羅恭五縣屬黔中道羈縻州永徽已後併省

據唐書地理志

五代

晉高祖天福五年都雲酋長尹懷昌附於楚

初武侯南征閩夷濟火獻糧通道以迎遂佐擒孟獲因令世長其土其後牂柯界中普里獐狍叛火受後主詔討平之時年已耆又賜鏤銀鳩杖以寵異焉火既平普里令其伯父克之子長之是爲鹵氏大宗十八傳至勿世居閩勿少子阿納不容於其兄嫂徙居於南廣之鹿里旣而強盛乃帥其部族沿延江東侵至豎之夾水保焉遂入晉樂又西南馳至都雲洞留其部族居之後分爲十二部

據大定府志水西安

都勻縣志稿卷七

年紀

十三

氏本 至是楚馬殷子希範襲殷官爵封楚王天福四年加天册上將軍承制如殷

故事溪州刺史彭士愁

元作士然今據溪州銅柱記改

率錦獎諸蠻攻澧州希範遣劉勅劉全明

等以步卒五千擊之士愁大敗勅等攻溪州士愁走獎州遣其子師曷率諸蠻酋降於勅溪州西接牂柯兩林南通桂林象郡希範乃立銅柱爲表命學士李皋銘之於是南甯州酋長莫彥殊率其本部十八州都雲酋長尹懷昌率其昆明等十二部牂柯張萬濬率其夷播等七州皆附於希範

五代史楚世家

宋

太祖乾德元年春洞溪番長納款輸誠

太祖旣下荆湖思得通蠻情習險阨勇智可任者以鎮撫之有辰州獠人秦再雄者長七尺武健多謀在行逢時屢以戰鬥立功蠻黨伏之太祖召至闕下察其可用擢合州刺史官其子爲殿直賜予甚厚仍使自辟吏屬予以州租賦再雄感恩誓死報効至州日訓練士兵得三千人皆能被甲渡水歷山飛墜捷如猿猱又選親校二十人分使諸蠻以傳朝廷懷來之意莫不從風而靡各得降表以聞太祖大喜復召至闕面加獎激改辰州團練使又以其門客王允成爲辰州推官再雄

盡瘁邊圉五州連袤數千里不增一兵不費帑庾終太祖世邊境無患宋史南蠻傳

太宗至道元年西南蕃牂柯諸蠻入貢宋史本紀

至道元年夷王龍漢瓊遣其使光進率西南牂柯諸蠻來貢方物太宗召見詢以地理風俗譯對曰地去宜州陸行四十五日土宜五穀多種秧稻以木弩射麋鹿充食每三百戶為一州州有長殺人者不償死出家財以贖國王居有城郭無壁壘官府惟短垣上因令作本國歌舞一人吹瓢笙如蚊蚋聲良久數十輩連袂宛轉而舞以足頓地為節詢其曲則名曰水曲其使十數輩從者千餘人皆蓬髮面目黧黑狀如猿獠使者衣虎皮羶裘以虎尾插首為飾宋史蠻夷傳

真宗景德元年詔西南牂柯諸國進奉使親至朝廷者令廣西西路發兵援之

先是龍光進等來朝上矜其道遠人馬多斃因詔宜州自今可就賜恩物至是懇請詣闕故有是詔宋史蠻夷傳

元

世祖至元十六年三月八番羅甸內附置八番羅甸宣慰司及羅甸等十安撫司以兵三千人戍之貴陽府志

都勻縣志稿卷七

年紀

十四

至元十六年潭州行省遣兩淮招討司經歷劉繼昌招降西南諸番仍以兵三千戍之是年宣慰使塔海以西南八番羅氏等國已歸附者具以來上洞寨凡千六百二十有六戶凡十萬一千一百六十有八西南五番千一百八十六寨戶八萬九千四百西南番三百一十五寨大龍番三百六十寨元史地理志

二十六年夏六月甲戌爛土等洞長忽帶等以洞三百寨百一十內附元史本紀

秋七月癸酉以八番羅甸宣慰使司隸四川省

冬十月乙卯以八番羅甸隸湖廣省元史本紀

二十七年秋七月戊午湖廣行省以八番兵討貴州苗

貴州苗蠻三十當千餘人作亂劫順元路遂攻阿牙寨殺傷官吏其衆遂盛湖廣省檄八番蔡州均州二萬戶府及八番羅甸宣慰司合兵討之

二十八年二月辛巳以湖廣行省八番羅甸司復隸四川省元史本紀

冬十月丁亥洞蠻爛土立定雲府改陳蒙洞為陳蒙州合江為合江州元史本紀

貞定文集

莫據

二十九年春正月癸丑設陳蒙爛土軍民安撫司

八番都元帥劉德祿言新附洞蠻十五寨請置官府以統之詔設陳蒙爛土安撫司

三月己酉併省亦奚不薛及八番羅甸宣慰等官

時中書省言亦奚不薛及八番羅甸既各設宣慰司又復立都元帥府其地甚狹而官府多宜合二司帥府為一詔從之且命亦奚不薛與思播州同隸湖廣省羅甸還隸雲南以八番羅甸宣慰使烏魯斯原作羅思等并為八番順元等處宣慰使都元帥佩虎符

庚戌賜蘇克

原作速哥

烏魯斯賽音布哈

原作賽因不花

蠻夷之長五十六人金紋綾絹各七十

九疋及弓矢鞍轡

三十年夏四月己亥省八番重設州縣官

庚寅烏魯斯請以八番見戶合思播之民兼管徒宣慰司治辰沅靖州常賦外歲輸

鈔三千錠不允

三十一年夏五月丁卯烏魯斯逃歸

都勻縣志稿卷七

年紀

十五

烏魯斯初為內府必闍赤二十一年拜監察御史遷雲南行省理問領雲南王府事後以忤桑哥被譖籍其家無驗詔寢其事二十六年置八番羅甸宣慰司進嘉議大夫宣慰使時諸蠻叛服不常烏魯斯平之立安撫等司以守焉二十八年平楊都要等九月進中奉大夫錫虎符越年為八番順元等處宣慰使都元帥賜三珠虎符至是犯法為人所訟懼罪逃還京師元史節傳

秋七月戊辰減八番等處所設官二百一十六員

先是八番稱新戶九十萬戶設官四百二十四員及遣官覈實止十六萬五千餘

戶故減之

元史本紀

成宗大德元年九月壬戌命湖廣遣兵戍八番順元

貴陽府志

八番順元等處初隸湖廣後改隸雲南雲南戍兵不至其屯駐舊軍逃亡者眾仍

命湖廣行省遣兵戍之

元史本紀

十一年五月甲申詔免八番差發一年

按貴陽府志順元二字

時武宗即位詔雲南八番田楊地面免差發一年其積年逋欠者蠲之逃移復業者免三年被災之處山場湖泊課程權且停罷聽貧民採取元史本紀

英宗至治二年十一月己未置八番軍民安撫司改長官所二十有八爲州縣

三年春正月癸巳朔八番洞蠻酋長遣使入貢

元史本紀

十二月丁亥詔免八番思播差發一年振恤八番等處戍軍

泰定帝泰定二年冬十月丁巳八番蠻班光金叛合於岑世興

貴陽府志

八番宣慰司官

失備坐罪

元史本紀

文宗至順元年三月戊午以八番順元宣慰使特穆爾布哈爲雲南行省左丞從豫

王由八番道討雲南

時雲南諸王圖沁

原作秃堅

自立爲雲南王布呼

原作白忽

爲丞相阿哈

原作阿禾

呼喇呼

原作忽刺

忽等爲平章稱兵拒命遂以河南行省平章奇珠爲雲南行省平章及特穆爾布

哈率兵討之

順帝元統二年夏四月乙丑命順元等處軍民宣撫使八番等處沿邊宣慰使巴延

布哈承襲父職

至順元年三月癸未朔平伐都雲定雲酋長寶郎天都蟲等來降即其地復立宣撫

司參用其土酋爲官

都勻縣志稿卷七

年紀

十六

三年五月癸卯給平伐都雲定雲二處安撫司達嚕噶齊

原作魯花赤

溫都爾

原作都刺

等

虎符

明

太祖洪武十九年十二月置都勻安撫司

明史地理志七司傳

二十二年都督何福討平都勻叛苗

何福鳳陽人洪武初累功爲金吾後衛指揮同知從傅友德征雲南擢都督僉事

二十一年江陰侯吳高帥迤北降人南征抵沅江衆叛由思州出荆樊道渭河欲遁

歸沙漠明年正月福與都督聶緯追擊及諸鄙延盡殲之於是都勻苗叛福奏討

斬四千七百餘級禽獲六千三百九十餘人收降寨洞一百五十二處

明史何福傳

二十三年城都勻衛命指揮同知董庸守之

明史土司傳

六月乙丑藍玉遣鳳翔侯張龍平都勻蠻

明史本紀

張龍濠人從渡江屢立戰功十一年副李文忠征西番洮州論功封鳳翔侯二十

三年春同延安侯唐勝宗督屯田於平越鎮遠貴州議置龍里衛時都勻散毛散

狗二蠻叛佐藍玉討平之

明史張龍傳貴州志

二十五年九名九姓蠻亂命何福平之明史土司傳

何福既平都勻蠻遂拜平羌將軍討越州叛蠻阿資破降之擇地立柵處其衆置甯越堡遂平九名九姓蠻

二十七年城都勻衛據大清一統志

二十八年豐甯三藍等寨亂命顧成平之明史土司傳

成在貴州凡十餘年討平諸苗洞寨以百數皆誅其渠魁撫綏餘衆恩信大布蠻

人帖服明史顧成傳

六月壬申詔諸土司皆立儒學明史本紀

二十九年平浪洞水寨蠻狄把殺土官王應名都指揮程暹平之貴州通志

應名妻吳攜九歲子阿童來訴詔予襲明史土司傳

四月改都勻爲軍民指揮使屬四川布政司明史地理志土司傳

成祖永樂四年鎮遠侯顧成招諭合江州十五寨來歸明史土司傳

成再鎮貴州屢平播州都勻諸叛蠻威震南中土人立生祠祀焉明史成傳

十一年二月辛亥始設貴州布政司

都勻縣志稿卷七

年紀

十七

先是思州宣慰使田琛思南宣慰使田宗鼎構兵詔鎮遠侯顧成以兵五萬壓其境琛等就禽於是分思州思南地更置州縣遂設貴州布政司明史顧成傳都勻亦改

隸焉據明史土司傳

宣宗宣德元年平浪賊紀那阿魯等占副長官地殺掠葉果諸寨招諭不聽詔蕭授

平之明史土司傳

七年立陳蒙堡調泗城兵戍之

陳蒙爛土副長官張勉奏所司去衛遠地連古州生苗與廣西獠洞近化從寨長

韋翁同等煽亂乞立堡並請調泗城州土兵一千鎮守從之

八年建都勻府學大清一統志

九年都勻叛蠻平

九年韋翁同糾下高大刀蠻合廣西賊韋萬良等恣殺掠總兵蕭授遣指揮陳原

顧勇分道邀擊獲賊首韋萬良等三人翁同遂聽撫而落昌蔡郎等四十寨仍聚

衆拒敵授遣指揮顧勇進討平之明史蕭授傳土司傳

景帝景泰二年右都御史王來勦平都勻賊

景泰元年貴州苗叛總督湖廣貴州軍務侯璉卒於軍進河南巡撫王來右都御史代之與保定伯梁瑤都督毛勝方瑛會兵進討禽賊魁章同烈及其黨五十八人遂移軍清平且檄四川兵共剿草塘都勻諸賊賊望風具牛酒迎降節明史王來傳

六月己卯詔貴州各衛修舉屯田

明史本紀

英宗天順二年貴州東苗干把珠等僭偽號攻都勻衛命方瑛與巡撫白圭合川湖雲貴軍討之

東苗叛攻劫都勻諸處詔進白圭右副都御史贊南和侯方瑛軍往討圭以谷種諸夷爲東苗羽翼先剿破百四十七砦遂會兵青崖復破四百七十餘砦乘勝攻六美山干把珠就擒諸苗震讙

明史白圭傳

四年都勻衛饑

明史五行傳

英宗正統十四年爛土凱口苗王阿魯唐甕干把珠等叛圍都勻衛總兵田禮討平之

舊志

憲宗成化十四年天壩干賊首齋果峰峒陸光翁等聚衆爲亂詔起楊輝會兵討之時陳蒙爛土長官司張鏞奏天壩干賊首齋果侵掠請於所侵大陳大步等寨設

都勻縣志稿卷七

年紀

十八

一司隸安甯宣撫而豐甯長官司楊泰亦奏峰峒陸光翁等聚爛土爲亂先是宣慰楊輝平天壩干後即灣溪立安甯宣撫司爛土諸苗惡其逼已至是果等既攻陷天漂遂圍豐甯時輝已致仕子愛承襲力弗支求援於川貴二鎮各奏聞命仍起輝會兵討之

明史土司傳

十六年貴州巡撫謝杲始遣將撫天壩干賊

時陳蒙爛土長官司張鏞復奏齋果糾合九姓豐甯並荔波賊萬人攻剽愈亟帝責諸守臣玩寇於是巡撫謝杲言自天順四年以來諸苗攻劫舟溪等處不靖至今乃命鎮守大監張成總兵吳經相機剿撫

明史土司傳

二十年爛土豐甯諸苗俱叛

二十年爛土苗賊龍洛道等攻劫舟溪等處僭號稱王且欲犯都勻清平諸衛而豐甯長官楊泰與土目楊和有隙誘廣西泗城州農民九千於鍊坑等一百餘寨殺掠於是苗患愈盛

貴州通志明史土司傳

孝宗弘治二年爛土苗賊七千人攻圍楊安堡都指揮劉英統兵覘之爲所困命鎮巡官往援出之

明史土司傳

三年黃土坡苗蠻作亂官軍討平之一統志

四年爛土酋乜富架重惡龍等叛貴州通志

五年冬十月壬戌湖廣總兵官顧溥貴州巡撫都御史鄧廷瓚太監江德會師討貴

州黑苗明史本紀

六年廢都勻洞長官司大清一統志

七年三月癸巳貴州黑苗平明史本紀五月置都勻府於衛城明史地理志

初乜富架長脚作亂敕貴州巡撫鄧廷瓚提督軍務同湖廣總兵官顧溥貴州總兵官王通等討之七年諸軍分道進剿副史吳倬遣熟苗詐降富架誘令入寇伏兵禽其父子官軍乘勝連破百餘寨生繫長脚以歸羣蠻震懼廷瓚因言都勻清平二衛九長官司其人皆世祿自用其法恣虐激變苗民亂四十餘年今元凶就除非大更張不可請改為府縣設流官與土官兼治庶可久安因上善後十一事帝悉從之遂設府一曰都勻州二曰獨山麻哈縣一曰清平苗患自此漸戢明史鄧廷瓚傳

八年改獨山長官司為土同知大清一統志

都勻縣志稿卷七年紀 十九

武宗正德三年吳欽吳敏爭襲仇殺尋釋

正德三年都勻長官司吳欽與其族吳敏爭襲仇殺鎮巡以聞言欽之祖賴洪武間立功為長官陣亡子琮幼弟貴署之及琮長仍襲傳至欽三世敏不得以貴故妄爭詔可之明史土司傳

十二年八月貴州巡撫都御史鄒文盛討平清平諸苗

先是清平苗阿旁阿階阿革據香爐山稱王據貴州通志在十一年巡撫曹祥調永順保靖

土兵討之尋被劾罷於是興隆偏橋平越新添龍里諸衛咸被其患文盛至檄川湖兵協剿以貴州兵擣礮木砦禽阿革川湖兵至抵山下山壁立惟小徑五賊皆樹柵仰攻不能克乃雜製繩梯及鐵猫爬山虎諸具督宣慰彭久宵彭明甫等選精銳緣巖而上拔木柵縱火焚巢斬賊首阿旁等乘勝勦黑苗破龍頭寨及都蘭都蓬密西大支馬羅擒酋阿茲等天漂天壩黎從楊保苗坪諸寨悉聽招撫復業者三千八百餘戶斬首一千五百九級通撫苗衆三百七十五寨捷聞下璽書獎

諭賞賚有差明史文盛傳貴州通志

世宗嘉靖元年改安甯為凱里隸貴州以楊張襲宣撫

舊制土官有功祇賜予衣帶及旌賞部下人員無陞職加銜者播州宣慰使楊斌以平普安蠻功於正德初加四川按察使銜賜蟒衣玉帶安甯宣撫楊宏忌之遂相讐殺宏既死其弟張求襲職不得時盜邊劫白泥司印信復與相搆兵守臣乞改凱里屬貴州以張爲土知州解釋之兵部議張習父兄之惡幸免於辜敢肆然執印信以要挾當命川貴守臣按其前後爭產殺人諸罪寘於理若張悔過輸情還所獲印尙可量授一官聽調殺賊以自効倘或怙終必誅以爲玩法戒既用胡世甯議謂張黨已成若不因而撫之恐流禍無已乃許張襲宣撫而改安甯爲凱

里隸貴州

據蠻司合誌
遵義府志

十六年貴州巡撫都御史汪珊討凱口壘苗平之

貴州通志

初王阿向先世爲土官爲王仲武先人所奪至阿向與仲武爭印煽亂總兵楊仁巡撫陳克宅平之斬阿向等盡逐其黨以地屬都勻府改名滅苗鎮仲武因諸苗失業陰爲招復旋科索之諸苗不勝怨遂推阿向餘孽王聰王佑爲主巡按楊春芳遣李佑等撫諭之賊質佑等乞還土田官印乃釋佑春芳以聞詔巡撫調官軍三萬人集壘下壘故絕險其要害置弩樓疊石爲防攻之三月不克復調宣慰安

都勻縣志稿卷七

年紀

二十

萬銓兵合勦萬銓力戰破賊聰等皆伏誅前後斬首二百六十餘級降苗寨一百五十餘男婦二萬餘口捷聞叙功賞有差

三十七年春三月刑部主事張翀以劾嚴嵩成都勻

翀戍勻九年首建鶴樓書院召諸生講學其中都勻文化肇盛於此嘗銘其讀書堂右側山麓石壁曰仁智之情動靜之理棲此盤谷飲此泉水其冲逸如此

都勻苗阿章叛貴州巡撫都御史高翀檄兵備項廷吉土官蒙繼武楊進雄討平之

獨山州志

穆宗隆慶六年平浪苗靠仰叛都御史蔡廷臣

原作蔡文當誤
據貴州通志改

檄兵備劉行素知府

陸東指揮楊一方調土官蒙天眷討平之

獨山州志

神宗萬歷五年冬十月丁未杖進士鄒元標成都勻

明史本紀

時張居正奪情輔政元標抗疏切諫杖八十謫成都勻衛在衛六年承張翀講學之後別建南皋書院與諸生究心理學一時名儒如陳尙象吳銓余顯鳳陸從龍德龍艾友芝友蘭等皆出其門

六年貴州巡撫都御史王績招降天漂諸苗

天漂者苗坪黑苗種也在湖貴川廣界與者亞鼎足居萬歷六年天漂請內附都御史遣指揮郭懷恩及長官金篆往問狀而阻於者亞乃遠從丹彰間道通天漂會苗坪黨銀等亦以格於者亞不得通都御史王績遣使責者亞部長阿斗斗願歸附平定績謂斗故養善牌部何故欲屬平定必有他謀下吏按驗果得實蓋欲往平定借諸蒙兵襲養善皆內地奸人天金貴等導之遂治金貴罪以者亞仍屬養善路遂通於是苗坪天漂皆請奉貢賦比編氓名其地曰歸化隸都勻府凡使命往來自生齒以上悉跪拜迎送夾騶從行前吹蘆笙唱蠻歌呼導而馳事聞帝嘉之七年者亞阿斗以反誅乃罷樂平吏目增設麻哈州州判一員令居樂平司以養鵝者亞羊腸諸苗屬之

明史土司傳

十二年建甕袍哨

甕袍爲通者亞要道兵備副使洪邦光題請建哨資控制從之

十三年者亞苗復叛貴州巡撫舒應龍討平之

十四年討答干寨苗平之

貴州通志

初者亞阿斗反答干寨阿其應之斗誅阿其屢犯順十四年土舍吳楠王國聘慮

都勻縣志稿卷七

年紀

二十一

阿其叵測禍及己請以答干雞賈甲多諸寨屬蒙詔立宣威營歲輸賦獨阿其不服引者亞殘苗圍宣威營大譟曰此我地誰令爾營此蒙詔常徵秋稅阿其度使至以血釁門令無通居常張繖鼓角繪龍鳳器遂與雞賈甲多仰枯諸苗擊牛酒爲誓劫歸化官兵不敢近獨山上吏蒙天眷願以兵進勦乃使人佯言漢已黜蒙詔令以宣威地還阿其且暮撤兵去矣阿其乃親馳樂邦牛場調視言人人同遂弛備天眷驟入斬阿其雞賈甲多皆降其屬蒙詔者自答干雞賈甲多外有塘蛙當井斗坡等十七寨小橋熟苗龍木恰視寨事年老子倅襲頌糧者遂不及恰恰輒奪倅之有以爲養倅訴於官官逮問恰非罪之也恰輒鎖漢使已而逐之曰速去此我家事再來當以鳥雞諸寨踐漢邊矣官以計禽之死獄中無何龍化龍羊山苗引川苗作亂曰漢無故殺苗苗請報之官軍戰不利既而都司蔡兆吉招諭令降待以不死於是諸苗皆散倅視事如故

明史土司傳

四十三年平舟苗楊珂叛貴州巡撫吳岳平之

初平舟長官楊進雄無子以兄繼祿子珂爲後既生子治安而疏珂珂怨雄雄乃奪珂財產並其父逐之珂頗得民心遂爲亂據唐宿壘攻雄雄敗走屠其家各上

疏計奏詔推問都御史趙武以雄不法逮之獄檄獨山土酋蒙繼武諭珂歸命許改土爲流以安之治安計不便乃陰許以六洞賂繼武借兵繼武乃發兵攻珂復平舟珂走廣西之泗城繼武遂屯耕六洞地六洞民不服助珂與繼武相攻珂復據平舟巡撫吳岳招降其父繼祿六洞乃安明史土司傳

十二年夏五月都勻大水

四十三年都勻地震

光宗泰昌元年都勻饑均乾隆貴州通志

熹宗天啓六年夏貴州巡撫王城巡按傅宗龍遣兵平都勻麻哈諸叛苗

黔中四面皆苗而最狡悍者無如都勻安邦彥初叛圍龍里新添皆藉其衆至是數出剽掠清平新添地方餉道爲梗平越知府周鴻圖會都司張雲鵬率兵攻擺沙大寨擺沙居寨之中距平越百餘里乘夜由閒道掩襲破之賊遁入箐中其中米穀山積次日搜百里大山移營牛場箐攻甕岳等寨復攻都勻城西南狝賊八路會兵入箐各有斬獲復攻江肘戶西高平養古數十寨斬首二千餘級蕩二百餘里貴州通志

都勻縣志稿卷七

年紀

二十二

清

世祖順治四年二月流賊孫可望攻定番州城屠之按察使張耀參議曾益都勻知

府陳瑞同士民死守盡遇害貴州通志

十三年苗匪孟阿危叛總兵馬寶即馬三保討平之據獨山州志引舊都勻志

阿危府屬苗攀寨苗也寨在今平舟縣北二十里以妖術結十一州司苗狝叛劫麥冲堡進攻

獨山州時州治僅土城阿危圍之州人萬國清率鄉勇守禦獲全寶駐兵郡城得

報進討平之賊平後州人德寶建馬公祠於城康熙開寶從吳三桂叛祠遂毀寶平阿危國清從更多保全士民感焉歿後公請入鄉賢祠

聖祖康熙七年增修府署及名宦鄉賢二祠論通志

省清平縣入麻哈州

十一年復置清平縣以新添之丹行長官司來屬改都勻衛爲縣以上黔南職方紀略

十二年春二月都勻苗亂殺天壩司長官天應祿乾隆貴州通志

以府屬長官司並屬都勻縣黔南職方紀略

三十八年都勻白苗甲多等寨作亂叅將張應鑾討平之

五十年春二月都勻城北河岸巨石如屋逆水自移以上乾隆貴州通志

世宗雍正六年十月貴州巡撫張廣泗討八寨生苗平之

八寨爲都勻要隘丹江清江古州之咽喉穴其中者爲黑苗往者半隸土司自將土司戕害後雖改屬都勻府而流土俱不受制與化外無殊楊排楊堯也告楊烏四大寨恃強恣肆附近諸小寨皆爲役使又番仰番扛擺卓等十餘寨與丹江諸生苗勾結剽掠六年春正月總督鄂爾泰謂生苗不亟加懲治匪獨爲苗害且大爲民害調貴州按察使張廣泗赴滇授以勦撫機宜五月十六日廣泗由貴陽率兵赴都勻六月初九日同都勻營叅將趙文英等營於八寨隘口張示開導有代理代省九門長塘等四十餘寨詣營就撫而楊排楊堯等寨拒抗如故且脅數寨爲援十二日文英督兵攻擊交鋒未逾時即奔竄次日有被脅之牌牙壩固等賊及大肚小肚等十餘寨相率投誠時獨山汛漢上官兵自普聖奉調赴八寨途經交歸羊甲等寨曾與楊排楊堯糾結不知二寨敗猶競出堵截官兵鼓勇連破六寨於是附近交歸之甲些等十餘寨皆來降十七日移營斗魁斗魁者八寨適中扼要地也當是時軍威初震數十里內之山洞生苗紛紛歸附惟番仰番扛拒命十八日廣泗密飭撫標守備張瑤麻哈州知州孫葵將兵分攻趙文英據要

策應苗亦分路拒敵官兵奮擊擒斬追焚巢穴於是番仰番扛暨楊排楊堯等寨諸賊皆逃匿亦有畏威乞撫者七月廣泗移兵開丹江總督鄂爾泰馳檄戒之曰兵雖屢勝而地險苗衆未可玩緩急進退務籌萬全二十四日廣泗率兵下丹江賊千餘阻去路擊走之二十六日抵梧桐隘口賊瀾漫山谷擊之則四竄林莽少頃復聚是時都司羅資衰奉調由凱里進丹江亦爲苗所阻乃改途由囊孟走烏疊鏖戰九日始達廣泗營適總督密飭至以丹江逆苗雖屢經挫衄毫不畏縮倘勾結八寨以襲我後則糧運必不繼戒勿輕進於是廣泗等移營甕城以其地扼八寨之吭而拊丹江之背也而八寨已附之苗果爲丹江苗煽誘復叛廣泗請益兵八月總督調左營守備徐希達把總楊漢飛提標遊擊田昌友貴陽遊擊史應貴守備任龍等各領兵赴軍前而統以定廣協副將蘇大有又造靖蠻大砲送行營飭廣泗等以羣苗負險狡詐莫測天時可乘地利宜審近功速效亦非遠圖凡事知難斯易視易轉難務須慎重是月廣泗奉命巡撫貴州總督復以機宜咨授謂八寨與丹江聲勢相倚而丹江在內八寨在外非大創八寨使其弭耳帖尾恐苗情反覆無常欲進丹江輒爲所阻即不然而我兵已入丹江兩地逆苗更番擾

我益滋掣肘廣泗乃於九月二十六日先進剿甲些烏歸等附賊之三十餘寨十月初四日調得丹江苗賊來助逆伏兵待之初五日苗果蜂擁至遇伏兵驚潰官兵追擊遂破附近也告之大小八寨又乘勝焚首惡之楊排楊堯楊烏附惡之也條楊列者良等數十寨是日蘇大有率兵分剿偵知前路有賊令官兵分左右潛伏少頃見苗數千來俟其過半截擊之苗首尾不能相顧把總高選等由左路逐殺燬擺楷也略壤頂壩構四寨大有率守備傅又新等由右路逐至也告關口手斬逆苗無算會文英兵亦至遂焚也告三大寨各寨苗皆震讐數日內楊亭番仰黨找達石硯爽排憂等數十寨各刻木輸誠廣泗示諭除首惡不宥外餘許就撫八寨既平議進丹江留文英鎮守知縣魯朝聘招撫附近生苗其極遠之千家寨俱後先歸化

十二月討丹江生苗平之

丹江與八寨密邇而清江古州諸地界亦牙交繡錯生苗聲氣相通盤踞其中者爲桃繞等四十餘寨名大丹江右有烏疊等二十餘寨爲藩籬名小丹江左有雞講等十餘寨切近九股兇惡尤甚又大小丹江所恃以濟惡之區也十月八寨既

平總督鄂爾泰咨巡撫張廣泗於十一月十一日率兵進取丹江相度形勢烏耶爲大小丹江要隘抱得亦大丹江出沒之區烏騷則延屬雞講乃調副將蘇大有由八寨九門歷枯桐寨直取小丹江令副將張禹謨由烏溜進攻抱得期會於大丹江並分兵屯烏騷山岡以牽制雞講廣泗率遊擊田昌友史應貴都司羅資袞等駐兵烏耶坡以扼要隘十二日大有自八寨出烏高抵枯桐兵威初張羣苗紛紛竄匿官兵沿途搜剿十五日越枯桐抵石板寨苗數千阻扼大有以重兵伏叢薄而率輕兵誘擊之苗潰敗次日大有分兵四伏獨登相近烏疊之山岡覘賊虛實彌望深林灌莽闕若無人突聞四山震動賊擁如蜂伏兵起賊大敗隕首洞脅者纍纍填澗壑二十日趨小丹江賊於頭關土城密佈銃砲以拒大有直逼城下奮勇先登手刃賊四十五人連破土城五座追至小丹江燬其巢穴移營駐烏疊寨由是大有爲諸苗所深畏雖婦人小子聞其名無不咋舌是月十三日昌友等分兵奪烏耶左右山岡進剗頭關口禹謨亦奪烏溜寨進攻抱得焚三寨時烏耶關口苗四路來寇昌友連日攻擊旋敗旋聚相持未下以故禹謨雖破抱得懼賊襲其後不敢進廣泗聞之輕騎赴抱得營令羅資袞出左路守備梅先春出右

路夾攻囊猛賊奔散火其寨囊猛者大丹江縮穀處也此寨既平可以直走大丹江乃令禹謨馳赴烏耶助昌友而自領其衆二十四日廣泗遂移營於小丹江賊糾衆數千乘官兵初至肆衝突參將王維一領定番土兵擊敗之賊乃遁去十二月初三日大有進攻大丹江黃茅嶺破之楊排等八寨刻木來降昌友應貴等分攻固猱計籠等六寨悉燬之初五日官兵分三路攻破桃繞於時諸苗震恐皆赴大營乞撫惟抵箇雞講等寨堅守不出而大小丹江之苗剿撫歸附者十已七八初十日廣泗令昌友應貴等率兵直趨抵箇又令安南營兵據其寨左之高嶺苗數千競出皆殊死鬥官兵併力夾擊大破之窮追至雞講山後次日禹謨兵亦至苗仍聚衆合戰官兵合擊之披靡奔潰棄刀鎗火銃擲牌諸器械山徑爲之阻塞官兵焚雞講五寨是時衆苗竄伏山箐無所得食相繼赴大營匍匐乞憐旬日之間次第就撫遂編其戶口留兵鎮之明年丹江鬼師老楊老水等煽衆復叛襲大丹江營時總督鄂爾泰坐鎮貴陽命參將官祿剿之不克復檄總兵哈元生將兵協勦賊遁尋獲老楊等梟示餘黨悉平

以上均貴州通志

黔南識略

都勻縣志稿卷七

年紀

二十五

移都勻協駐八寨

都勻舊設參將駐府城八寨既平改協移駐置左營遊擊守備各一

建丹江營參將署

左軍守備署

在大丹江

右軍守備署

在八寨東三十里雞講城

屬之

九年建丹江八寨都江各廳署

時新闢苗疆設八寨同知丹江都江通判各一均隸都勻府並於都江建上江協

左營遊擊守備各署

以上據貴州通志

十年以廣西慶遠府之荔波縣來屬

荔波於宋元時爲羈縻荔波州又爲南丹安撫司明洪武元年并入思恩縣十七

年析置荔波縣屬慶遠府後隸貴州都司順治間仍屬慶遠府至是來屬

黔南紀略

十二年建三脚州同署

十三年秋八月甲午調張廣泗總理貴州苗疆事務

初廣泗以平苗功授湖廣總督令尙書張照總理撫定苗疆兵馬錢糧事務羣苗復叛特命貴州提督哈元生爲揚威將軍節制通省官兵彈壓控馭而以湖廣提

督董芳副之其後各持一見貽誤軍機乃調張照回京仍以廣泗代之
冬十月丁卯特授張廣泗爲經略

至是自揚威將軍哈元生副將董芳以下俱聽節制調遣

高宗乾隆元年春二月壬辰獎經略張廣泗攻克大小丹江暨高坡山苗等處功

夏六月己巳命修築貴州苗疆州縣城垣

癸酉授張廣泗貴州總督兼管巡撫事

以貴州料理善後必事權歸一專責成也

二年夏四月己巳裁清平等二十三處驛站

秋八月庚寅鑿清水江及都江

貴州總督張廣泗奏略謂黔省地方鎮遠以上自昔不通舟楫自都勻府起由舊
施並通清水江至楚屬黔陽縣直達常德又由獨山州屬之三脚壘達來牛古州
抵粵西屬之懷遠縣直達粵東乃天地自然之利宜在各處修治河道鑿開緯路
以資輓運從之

十二年春三月辛丑罷貴州總督

都勻縣志稿卷七

年紀

二十六

時苗亂已平帝以雲貴二省原係一人管轄詔仍復舊

二十六年夏六月乙未弛貴州民苗結婚禁

三十一年冬十一月戊寅貴州按察使高積請禁苗猓佩刀跳月不許

貴州苗猓喜佩刀出入又孟春男女會合於野擇平地爲月場謔浪終日暮挈所
合而歸高積以每釀重案請定例嚴禁帝謂苗人向化日久耕鑿安恬今內地齊
民尙不能道德齊禮而於苗疆禁立科條紛更滋擾無謂弗許

五十七年冬十二月癸未改貴州凱里等協營邊缺爲內地

仁宗嘉慶二年春三月己未都勻戒嚴

時南籠狃苗叛攻陷册亨帝以都勻古州一帶與粵西接壤册亨旣被陷而捧鮓
羅斛歸化等處俱有苗匪特命戒備並亟籌勦洗

宣宗道光二十二年春二月癸卯移都勻縣訓導駐八寨廳

文宗咸豐四年夏四月丙戌貴州巡撫蔣爵遠討獨山州賊平之

四年春二月丙申獨山土匪陸阿潰等勾結粵西楊元保作亂攻州城貴州巡撫
蔣爵遠飭古州鎮總兵彭長春發兵應援獲陸阿潰誅之餘黨竄踞播讓拉旺下

司各地遂分兵進勦皆捷至汪籠獲楊亞三元保子也元保退踞董你參將英志
攻破之負傷而逃至廣西昔里山官兵合圍遂就擒解省正法餘黨悉平據東華錄
冬十月庚戌楊鳳寇麻哈敗之舊志稿繫此於五年夏四月按東華錄楊鳳授首
在三月七日不應四月尙有入寇事今依邵亭遺

改詩

楊鳳肇亂帝調川滇兵會剿屢挫賊勢蹙由羅斛竄蘆山搭溝山參將閃雲率
師截擊遂由大塘都勻獨山分道寇麻哈時鹿丕宗護東道檄署知府何鋌會兵
夾擊大敗之賊竄平越三月己巳至葛莊司石阡府地清江通判韓超雲南鹽法道王
成璐率兵追擊之殲焉據東華錄

五年春二月知府鹿丕宗率師討丹江苗

時楊鳳倡亂桐梓黔疆苗民皆蠢動台拱丹江乘機竊發警報頻聞丕宗承大府
檄會古州鎮總兵巴揚阿討之比至凱里賊已間道犯清平丕宗赴援先是有川
民劉義順習燈花教又名青蓮教一日清水教實白蓮教遺孽也其術以半夜誦
經拜燈令開花如斗大以愚人有司捕之急乃集黨倡亂旋敗亡入黔往來都勻
平越間徒黨彌衆都勻賀昌明沈中和羅天明靈安志作光明等尤傑出漸布丹江八寨

都勻縣志稿卷七

年紀

二十七

清平麻哈等處時盡丹江內匪有司莫能覺丹江本生苗獷悍喜殺掠至是揭竿

起

據舊志稿
靈安縣志

夏四月麻哈陳大六作亂討之大六亡走

大六麻哈巖寨人素無賴以事繫獄方楊鳳圍城出罪人登陴自贖大六乘間亡
歇肉聚黨謀不軌把總張劉順引兵捕之亡山中焚其廬而還舊志稿

五月黃豐扶連芳反陳大六柳天成應之

黃豐都勻府貢生饒資財值台拱丹江亂知府鹿丕宗屢檄辦團以年老辭弗獲
其族人野狗七者武生行七性貪殘若野狗然故名素習燈花教羅天明賀昌明
等常往其家至是黃當事得副豐辦團益招致亡命開豐倉食之焚掠鄰村事聞
丕宗遣隸賚榜開諭之野狗七殺隸於豐室豐大驚仆門楨上折其齒於是人皆
指目豐反狀遂據瓮朗叛有衆至萬連芳農家子素不逞丕宗欲除之未果至是
以張映奎爲軍師田阿受桂騰輝羅芳蘭劉應才等俱受僞職分據拉結山王司
五寨有衆數千大六亡山中其黨多偕之已而黃豐扶連芳叛應苗賊大六遂以
驍苗楊馬客羅五等據楓香均豕突狼奔恣意焚殺天成本黑苗狡很善鬥叛苗

推以爲主僞柳五王劉三王高九王楊三王張大王金幹幹李宰輔王義甫王七王八陳大六陳小改石景光解結巴等數十人僞秩皆天成先後所授衆亦數千據雞賈河勢與八寨賊馬登科都勻賊黃豐扶連芳相埒而殘暴過之

何九錫師潰來奔

苗匪過九門千總何九錫集兵團禦之時承平久士怯懦九錫戰不利所部多亡去遂來奔知府鹿丕宗納之舊志稿

六月甲午凱棠等苗陷崖門司

戊午上江齋匪陷三脚壘以上部亭遺詩

三脚既陷賊遂竄攻都江七月戊子城破八月癸卯竄攻高舊營兵潰遊擊保齡

死之據東華錄

都勻復戒嚴

先是苗匪數劫掠丕宗畏罪匿不報三脚陷乃以夷漢相讎告巡撫蔣壽遠飭募勇六百助捕勦丕宗募三百名老豹勇應募多賊匪駐校場旋譁變散去二百餘人知縣高德善募鄉勇五百名新豹勇時陝西布政使陶廷杰致仕家居餉需取

都勻縣志稿卷七

年紀

二十八

給焉始治城郭浚便河

明正德間副使李麟因苗警引河水繞城爲池萬曆間副使袁應文請知府王鍾珣先後疏鑿至是年久汗塞復浚

備守壘石爲守

據金澤行李際雲鄉中大事紀

辛亥及賊軍戰於花家地不利九門汛千總何九錫死之

議者謂甕朗賊密邇府城宜次第芟鋤蘇民困乃使邊牲張清瀾督兵擊花家地賊九錫恥前九門之敗請前驅自效丕宗許之賊嚴陳設伏以待九錫突入陷而殫時平浪河流大河各團軍於瓶口以禦賊賊火長塘馬寨村舍以濟衆驚潰

秋七月壬戌朔大閱

攻水竹園賊廩生張清瀾敗沒

花家地失利後賊益披猖丕宗乃厚撫士卒以清瀾將兵擊水竹園賊士卒懲花家地之敗人無鬪志賊悉銳遮擊之我師遂北清瀾力戰死傷亡軍械幾半屠蛟萬邦和赴省乞援

時官軍屢失利甕朗賊黃野狗七拉結山賊扶連芳與苗匪柳天成合不時喉陳大六沈大六楊虫妹段二弟田阿受桂騰輝胡四趙五等更番犯城城中守備嚴無隙可乘乃益糾黨據要害延燒各村寨哭聲震野驛遞不通營兵魯連貴潛出

請援中途爲賊遮獲被戕人心益懼廩生屠蛟萬邦和請行丕宗壯之寅夜縋城
出間道抵省大府始知府城久被圍乃發畢赤大定兵兩營來援又以川軍五百
人至人心稍定以上均舊志稿

秋八月賊入河流

凱塘苗酋王登元率黑苗千餘入河流廩生金彥襄處士金彥越金從行等罵賊
被害遂入平浪破何家營至平伐土匪胡四趙五叛應之鄉中大
冬十月丁巳八寨城陷游擊楊廷柱死之事記

初石阡營千總率兵援八寨至都勻丕宗留之援遂絕苗酋唐大先馬登科帥師
來攻入之游擊楊廷柱父子戰賊於大登高力竭陣亡廷柱果敢有謀略楊元保
事起先至獨山籌守具州城得全元保捨還守八寨屢卻賊至是以兵單無援殉

城死

據鄉中大事
記邵亭遺詩

十一月丕宗擊邦水賊及蟒山敗還

賊稔援軍單圍益急議者謂賊屢得志不復防我急攻之無不克者乃出兵向邦
水賊偵知伏蟒山俟官軍過半要擊之喪兵勇數百人逐北至城下

都勻縣志稿卷七

年紀

二十九

大疫

先是避兵者負米入城丕宗恐奸細漏跡一意禁止久之遂缺食陶廷杰發其藏
煮粥施賑賊又毒河上流飲之無不病者死亡十六七以上舊志稿

城兵大掠

初丕宗募勇勦賊以其婿石道安率之道安紬袴子選奕不能制至是大掠城民
惟閉戶而已

十二月復攻甕朗賊敗績

時獨山邱訪松率義勇來援謀攻甕朗賊至邦水遇伏敗績死者千餘人
六年春二月大定丁寶楨率師來援尋引去

寶楨以編修在籍募勇辦賊號丁家練以都勻被圍乃率所部來援未幾上游教

匪起移師去

舊志稿

夏四月貴州提督孝順率師來援

順聞都勻被圍率師由羅斛節節進勦從征者鎮遠鎮總兵佟攀梅古州鎮總兵
巴揚阿副將陳德功大兵次水竹園而以德功率師次文德德功驕悍無謀自移

駐麻哈之嘯天龍被圍星夜告急順移師往援都勻駐防副將彭壽適奉檄赴貴定郡城遂孤

平浪匪劉鳳翔降

先是黑苗入平浪麥冲等地皆陷於賊長冲宋四偽稱掃地王宋六偽稱蓑衣王麥冲李嗣元踞保家營李四踞撒彭劉鳳翔踞下平浪平浪土司王恩光以獨山兵來援鳳翔擊敗之至是佟攀梅率師勦賊連破平舟沙寨翁榨諸匪鳳翔懼乞降許之命練團辦賊

五月佟攀梅率師次包陽

時糧乏軍無鬥志戰不利遂次包陽剿諸土匪

包興等擊甕朗賊破之尋率師歸

軍功包興馬老四自省來援進攻甕朗擣其巢獲偽冠服無算知縣高德善歸功石道安二人怒以其師歸

六月辛卯巴揚阿率師攻平南營破之

巴揚阿既破教匪翁樹河之小卡遂攻平南營破之沈大六羅天明竄魚洞穿盆

都勻縣志稿卷七

年紀

三十

諸山進踞螺螄壳官軍復圍之破外柵因久雨煙霧迷漫山多箐谷不能前於是孝順方率師援麻哈以佟攀梅攻貢背而以陳德功守府城德功恃勇而驕好出浪隊數日不反識者危之

秋七月戊申奪知府鹿丕宗職以石均代之

會雲貴總督恒春率師來黔受賊謀言賊皆歸雷公山老巢都勻流民移徙方未定實無賊遂疑丕宗張皇邀功師久不下且檄石均來代均至罷老練守城兵口糧燈火皆滅陶廷杰力諫不聽

以上均據鄉中大事記

八月乙酉朔都勻城陷

時知府新故相乘守兵單清平八寨相繼淪陷奸民藍老二徐天炳楊南星魏廷俊及白衣庵僧覺凡等潛通賊夜分覺凡給雨花巖防勇憩庵中遂導賊梯城入藍老二等復舉火應之城遂陷雨花巖位城東北懸巖陡絕砌石巖上爲垣春來落英繽紛故名洪武間郡城始建圖以進帝筆志其處曰此宜慎防至是果驗賊既入官軍與巷戰皆敗潰知府鹿丕宗石均經歷穆承春都司陳遇恩在籍陝西布政使陶廷杰皆死知縣高德善典史孫嘉猷教授周至德教諭熊庭堅降於賊

事聞帝諭略謂都勻距省僅二百餘里乃因誤信投誠匪黨內應以致失守此時麻哈貴定等處均震動省城根本重地著蔣霽遠嚴密布置實力防守毋得稍有疏虞提督孝順駐守麻哈即可就近堵禦一面聯絡將弁奮力進攻陳德功已由雞場調赴谷硯文德一帶修攀梅之軍亦已從貢背繞往文德與陳德功會合該督撫務即飭令相機克復不得徒以餉絀兵單藉辭延誤云

據舊志稿

冬十月孝順率師復城禽徐天丙誅之戮黃豐尸順與巴揚阿轉戰而前所向披靡陳大六沈大六羅天明藍老二等宵遁禽天丙於陳誅以殉豐首倡亂竟逃顯戮以死勻人弗快也乃發冢戮其尸陳德功以失城革職逮至省會雲南回匪亂總督恒春釋之令至滇立功自贖

七年春正月白鳥來鳥凡千餘由鼓樓坡附郭田野而飛人謂之太平鳥或曰此凶兆也勻城其將再陷乎不然將折大將鳥而白羽也象凶服其來蔽天尚云太平乎

二月貴州提督孝順卒於軍

孝順率所部軍丁家山以巴揚阿軍月形西山為犄角邦水樂邦賊傾巢撲丁家

都勻縣志稿卷七

年紀

三十一

山以南路賊襲月形西山營牽揚阿順與戰不利時陳德功至滇殺掠順家以叛附回匪順聞大痛誘諸將出戰遂自戕營亦陷勻人大臨蔣霽遠以兵潰自戕聞帝疑之令密查確情具奏而以修攀梅領其軍

據舊志稿及鄉中大事記

閏五月丙午總兵蔣玉龍敗苗匪於獅子巖

玉龍軍獅子巖苗匪來攻以巨礮轟擊之斃賊目數名賊匪數百名餘衆奔潰

六月甲子黑苗入寇王萬祥擊敗之

秋七月丙戌苗匪寇麻哈守備張元謨擊敗之

七月丙戌苗教各匪悉衆攻麻哈提督修攀梅以守備張元謨等進勦斃賊數百名賊復分兵來攻又斃數百名賊首五名紅袍苗匪三名火賊棚二十餘餘匪逃

竄以上據東華錄

九月貴定團練來勻勦賊敗還

平伐團紳庭中珩率永聚永固忠義各團會官兵出包陽攻巖頭蔣谷諸賊團勇莫加官勇敢善戰賊畏之當輒靡乃置豪泥淖而誘之傷其足被殺賊反攻官兵屢挫遂道江肘而退次小場

冬十一月賊掠高棍巴揚阿率師援之

十二月修攀梅軍困於麻哈

時麻哈被圍久餉盡援絕乃檄巴揚阿轉輸應援至皂角埡賊悉刦以去軍中大困除夕攀梅殺馬食之將士感泣

八年春正月己卯革提督修攀梅職

巡撫蔣壽遠奏劾攀梅擁兵數千株守麻哈州城屢檄與巴揚阿會師剿賊弗從高棍之戰官軍失利距州三十餘里越日尙未與聞不職甚帝怒命革職留營効

力

據東華錄

己亥提督修攀梅陣亡賊遂陷麻哈

孝順歿攀梅領其衆守麻哈軍灰坡師久無功壬寅賊攻之攀梅戰歿賊將唐天佑殮之昇櫬至貴定而還遂陷麻哈天佑故業巫能識人休咎故苗人重之以爲將方入城使徇於衆曰入無焚戮不然將有大咎故全活甚衆

乙巳都勻復陷知府高廷鏌知縣楊順吉經歷羅維德典史周瀛洲荔波縣教諭史世光死之

都勻縣志稿卷七

年紀

三十一

麻哈既陷巴揚阿率師夜遁至勻紳民遮留乃允軍月形乙巳賊大至藍老二復導陳大六柳天成沈大六羅天明等陷西門廷瑛等死之揚阿先遁宵濟翁樹河賊追及死者大半委軍仗無算賊再入城無所得火廬舍衙署而去揚阿次舊縣

據舊志稿及鄉中大事記

二月癸亥苗賊攻獨山知州侯雲沂迎擊克之

賊匪由中安竄攻獨山知州侯雲沂調兵四伏乃集團開城奮擊賊敗北追之伏發盡殪是役斬賊首二賊目百餘夥賊三千餘人禽首逆沈大六及僞將軍四十二人皆誅之餘黨踞卡榜擺旁乘勝進攻又敗之

夏四月貴州巡撫蔣壽遠以游擊易占標軍凱口巴揚阿軍貴定擺忙之冷風口總辦下游軍務

秋八月陳大六降

初陳大六率衆敗吳九牢於重安九牢銜之遂下凱塘凱沼乞援僞王李大包大肚王登元等助之大六力蹙至舊縣請降巴揚阿納之餘衆潘明傑潘明德胡四趙五亦至凱口降於易占標尋叛去

據鄉中大事記

冬十一月免都勻等府州縣被擾地方額賦

東華錄

十年秋七月粵匪李天玉陷獨山屠之誅教匪羅天明等十餘人

沈大六之敗天明方踞郭家坪不之救粵匪陷獨山率黨歸附賊酋李天玉惡其不義執而戮之並殲其黨

九月粵匪陷荔波

以上據鄉中大其紀

冬十二月蠲免都勻八寨被擾地方額賦

據東華錄

十一年春二月丹江處士陳建勛營郭里號保家營

自八寨清平黃平麻哈來避難者各三百餘戶

夏六月陳大六勦谷硎土匪擒斬千餘人

冬十月苗匪李宰輔屢擊郭里保家營不利

亂離既久賊劫掠無所得乃與郭里和於馬坡設卡互市

獨山州知州劉正朝兼署府事

時賊匪如林

胡四趙五踞邦水之毛坡馬登科踞八寨店大仙踞古州大河文國典踞古州八寶山

以知州劉正朝攝府事

駐獨山

都勻縣志稿卷七

年紀

三十三

麥冲互市

苗教煽亂莠民亦乘機竊發至是黑苗久不至長冲轉甲巖頭馬寨各地土匪頗

厭亂亦與各團約於麥冲互市牛馬食物貨財云

貴州巡撫劉蕭汝芷等辦鄉團

是時全黔鼎沸官軍疲於奔命各地獲幸全者多賴團防故麥冲蕭汝芷下平浪

劉鳳翔尖坡脚陸鳳山小爛土楊永全凱西陸登庸金福壽金永全平忙田興和

白頭趙十七駱盛珍駱光前平舟土司楊本皆同時奉撫劉辦鄉團

穆宗同治元年春正月甲午命欽差大臣田興恕規復麻哈都勻等州縣

興恕湖南鎮筸人以副將率師入黔所向有功咸豐九年蔣玉龍兵潰奪職命署

提督十年晉欽差大臣督辦全省軍務遂復湄潭甕安平越各城進搗玉華山尙

大坪各賊巢帝以足資勦辦故有是命

二年春二月吳德容署獨山州知州仍攝府事

德容歷任甕安荔波縣事辦賊有能名至是升署知府

秋七月免都勻等府州縣被擾地方新舊額賦

三年春三月陳大六來勻剿賊敗還

大六自舊縣來勻剿賊次江肘胡四趙五率衆夜襲敗之大六遁還

夏五月陳大六復叛

賊將潘明傑潘明德率衆陷舊縣大六復降賊賊疑之劫至郭里置之保家營
建試院於獨山

府城再陷至是爲墟奉諭復舉童子試知府吳德容乃於獨山州城新建試院

四年春正月知府吳德容至平舟舉童試

時試院未落命就平舟司萬壽宮內舉行

三月平舟大火

月凡七見延燒民舍三百餘戶

平浪土司王恩照叛附李宰輔

宰輔黑苗柳天成之黨也恩照叛附之時凱酉王七王八踞谷洞喉黑苗助之勢
彌張

夏四月劉鳳翔擊黑苗於平浪敗之

都勻縣志稿卷七

年紀

三十四

黑苗吳九牢率衆萬餘將道平浪凱口竄擾京州兔場谷洞大平與王七王八合
勢銳甚鳳翔堅壁不出數日偵賊無備伏兵襲之斬獲迨盡賊宵遁恩照竄廣西

秋七月貴州提督學使黎培敬至獨山

舉七屬八屆文武生童試選辛酉科拔貢

鄉中大事記多制科廢學者無復羈縻羣不逞之徒遂多爲賊所資故廷議復之論

者謂此爲收拾人心之具賢於十萬師黔亂救平實由於此

九月劉鳳翔破谷洞獲王八

初副將彭口口規取谷洞久無功乃遣人招之王七降至龍里伏誅賊大震鳳翔
率衆進攻破其砦獲王八使告捷巡撫張亮基命逮省至三岔河白溺彭嫉其功
訐之當道不能平

五年春三月平浪團紳劉鳳翔遇害

彭口口喉平伐庭中珩率衆攻鳳翔鳳翔懼以黑苗來援弗克會瘴發死黑苗遁

回中珩發其尸戮之遂以辦團爲名大索金帛

夏四月平舟大疫虎豹啞人

五月白頭趙十七叛

劉鳳翔敗死中珩爲所欲爲莫敢誰何十七懼且傷鳳翔之死非命遂叛

以上據鄉中大

丁亥復荔波縣城

東華錄

六月陳大六伏誅

潘明傑潘明德胡四趙五諸賊殺陳大六於郭里大六性變詐其黨深忌之故置之郭里惡其反覆竟殺之夜隕霜殺稼

賊陷江肘大洞

初胡四趙五踞毛坡江肘王廷華聚衆保洞自衛團練吳光昭驍悍多謀廷華倚之賊屢來攻爲所敗伏賊要之光昭中銃死賊遂髻美男子十餘人袿裳衷甲詭辭致歸廷華納之入劫門者伏賊繼之洞遂陷廷華遁上平

秋七月貴州巡撫張亮基復劄駱盛珍等辦鄉團

庭氏既除鳳翔大事征繕平浪人苦之盛珍邑諸生衆推服乃潛至省力任勦賊事請命焉巡撫張亮基允之並劄陸登庸陸鳳山路光前楊永全等襄其事

以上據鄉

中大事記

都勻縣志稿卷七

年紀

三十五

孔憲隆率師及楚師合擊九千里苗匪破之

秋八月免都勻麻哈被擾地方額賦

東華錄

九月庭中珩率衆至平浪敗還

平浪駱盛珍奉劄辦團中珩弗知也乃率永固永衆忠義一心和合中興清正各團練入下平浪致討焉楊永全敗之於爛土至凱西陸登庸敗之至一盤井駱光前又敗之死者數百人中珩遁還

冬十月苗酋吳九牢寇獨山

九牢率下河黑苗及土匪萬人道平浪爛土入平舟大肆屠戮下平浪團兵禦之六洞翁奇二團舉衆來援均敗還乃寇獨山梯城入方登守者驚覺然銃擊之斃數賊疑有備潰逃至平忙田興和襲擊又敗之死賊數百

六年春二月黑苗襲郭里敗績

苗賊僞李王率黑苗分軍襲郭里營垂陷陳建勛舉衆力拒賊退後軍忽潰賊狂奔團練乘之禽斬二千餘人墜巖谷死者無算苗酋以身死

夏四月貴州提督趙德光討羅鏞谷廣諸賊破之

陳老冒就禽斃賊七百餘人

五月唐天佑降

德光率師勦黑苗次螃蟹賊將唐天佑諸詣降將殺之麻人德之為請貸獲釋旋

授以官

以上據鄉中大事記

七年秋七月川湘軍進勦甕安苗匪破之

自甕安失陷玉華驕頂諸山均為賊巢龍貴施黃之間苗教林立巡撫曾璧光請

飭席寶田李元度唐炯蹇闇率川湘軍分途進擊允之攻覺林寺獲逆首朱明月

五月移師破偏刀水老巢斬田應武王禮廷七月知府唐炯同知鄧錡總兵劉鶴

齡率師由龍坑袁家渡江界河三路渡江譚光前迎降甲午復甕安乙未玉華山

賊王廷英陳明忠等降進規尙大坪貴州提督張文德率師道谷脚巴鄉龍山進

牽賊軍賊勢大蹙

據東華縣志

九月攻尙大坪克之

玉華山破唐炯檄各軍進攻尙大坪慮巖門關險要遣張玉文等乘夜冒雨襲取

之直逼賊巢使王盛忠等招諭何黎氏降禽劉義順檻送成都誅之

據甕安縣志

都勻縣志稿卷七

年紀

三十六

復平越州城

尙大坪既破偽苗王楊阿九糾黨於牛場祁山壘結寨抗拒唐炯遣降人黃掄才

導游擊唐天佑所部黔軍乘間入州城據之提督劉鶴齡知府鄧琦派兵進攻斬

阿九破牛場烏雲山賊寨賊棄祁山壘遁去乙丑帝命由牛場上塘進規清平黃

平兩城回擊都勻麻哈

據東華縣志

潘明德降

初提督張文德率師勦賊復龍里貴定潘明傑及其弟明德復竄都勻糾苗酋柳

天成肆劫掠官軍進剿明德泣勸投誠弗從竄獨山明德攜妻子戚屬面縛乞降

文德納之令殺賊自効

冬十月庚申復都勻

麻哈復官軍進規都勻逆首楊開國等踞隘抗拒提督張文德以副將黎占魁張

樑等攻靖盜關而自率師攻王都保大捷潘明傑舉衆降占魁等斬關入進拔文

德殺賊五百餘人遂薄都勻賊不虞官軍驟至紛潰官軍奪門入殺賊千餘人柳

天成奔林棧坡金幹幹王義甫奔苦李均餘賊踞毛坡

以上據東華縣志

八年春二月提督張文德進屯羊安攻長塘五寨賊又攻柳天成於雞賈河皆不克
文德以復龍貴故銳意平苗督勇萬人屯羊安堡遣兵自堯林甲宋攻長塘五寨
賊又分兵自茅草坪攻柳天成於雞賈河皆無功引還舊志稿
夏四月己未復清平縣城

川軍復清平道員唐炯提督劉鶴齡陳希祥賞賚有差據東華錄
六月庚戌張文德之師敗於羊安

文德之初至也或謂賊狡險宜以兵屯平口高垓護糧道文德自恃東南宿將易
視之未幾賊果分兵扼冗王高垓又由吳秀平口犯展甲運道遂阻士卒殺馬掘
草爲食參將羅芳林督軍衝長溝箐翼通郭里糧道不利喪兵勇過半庚戌賊悉
銳來襲士卒憊不能戰遂大潰賊復沿途截擊士卒十亡七八委軍械幾盡文德
走獨山收潰卒獲千餘人尋引還

秋七月都勻再陷知府黃德裕副將黎占魁死之

羊安旣潰苗酋柳天成復糾金幹幹李宰輔王義甫等引衆十餘萬來攻占魁軍
乏食士卒饑不能戰營遂破占魁德裕力竭遇害喪兵勇數千人於是諸賊復割

都勻縣志稿卷七

年紀

三十七

地分踞之以上舊志稿

冬十月黑苗寇平浪游擊陸鳳山陣亡

平浪匪王十妹以黑苗吳九牢包大肚等衆復寇下平浪鳳山患之至一碗井
及駱光前籌防務還中途遇賊中銃死

九年夏五月甲戌命曾璧光分軍駐灰坡

時唐炯攻黃飄白保陳希祥攻筆架山六角基皆捷進規螃蟹並期會楚黔軍助
剿請於朝帝命劉岷飭席寶田由新城進攻甕谷隴巖門司而命曾璧光飭黔軍
由羅坪谷洞進紮灰坡牽都勻麻哈賊勢

秋八月川軍退次牛場

時黔撫曾璧光因川軍戰事多未與聞咨川督飭前敵將領事當關白川省因有
易將之議川軍一日夜退百餘里次牛場甕安縣志苗匪復熾重安黃平復爲賊踞事

聞詔切責據東華錄

冬閏十月官軍復都勻賊酋李宰輔來降

提督周達武初至黔帝命先清定廣再由龍貴平甕規都勻陳喬生授首遂檄總

兵劉士奇何雄輝由邦水文德分道並進期會城下柳天成不能支奔雞賈河宰
輔本髮匪逸入黔附天成爲元帥有衆千人據平浪因聞天成敗舉衆降雄輝受
之或議其凶悍難馴不可留雄輝易之且令仍統其衆舊志稿

十一月辛丑命曾璧光規復都勻麻哈兩城
帝以都勻麻哈兩城爲逆苗仰食之域不知都勻已復故有是命據東華錄

十年春正月李宰輔復叛
宰輔降雄輝使親信鉗束之滋弗懌至是與黃祥英周十二連合各寨降苗同叛
把總王智慧舉兵攻之中銃死諸軍懲羊安之失相率奔潰雄輝退次谷紀關據舊稿志

席寶田分軍進剿南瓦台盤高坡雞擺尾甕谷隴各賊巢克之

楚軍既克台水九節等寨苗賊退踞雞擺尾高坡寶田遂約戈鑑分兵進攻克南
瓦台盤逆酋金大五撲鎮安又敗之高坡雞擺尾甕谷隴各賊巢以次克捷徑排

羊排雜趣凱里據東華錄
二月提督周達武率師來勻剿賊

都勻縣志稿卷七 年紀 三十八
達武至平浪破李宰輔賊衆宰輔竄踞桃花五寨鄉中大

復八寨上江下江三脚各城
都勻丹台連戰克捷古州文國興唐大仙懼皆出降遂復八寨上江下江三脚各
城曾璧光令以其衆駐八寨而調劉廷玉一軍鉗束之以王彥軍等由平口進兵

遙爲聲援據東華錄
夏四月柳天成伏誅都勻平

官軍自剿敗竄匪李高脚後總兵何世華進攻都勻克之天成率賊來爭敗遁內
套王義甫誅之傳首軍前乘勝掃蕩都勻西北賊壘轉戰東南連平楓香均斑竹

園各望寨禽斬招降乞撫者無算都勻平據東華錄鄉中大事記

席寶田等軍攻拔排羊二百餘寨復丹江及凱里
丹凱既復逆酋張秀眉復集潰黨盤踞雷公山楚軍乘勝進攻南刀大塘堪洞各

賊巢皆捷遂趨雷公山平雷公坪九眼塘燕子窠陟其巔縱橫盪決殲賊千數百
名秀眉率餘黨竄逸勢益蹙據東華錄

龔繼昌率師攻螃蟹賊巢克之

雷公山破賊復屯踞螃蠏麥哨謀抗拒提督龔繼昌分兵攻之搗其巢
六月復黃平清平各城

初清平黃平間賊巢林立驛道中梗至是清水南北岸經楚軍漸次肅清黔軍由
都勻麻哈分道進剿克復清平重安各城驛路以通

以上據
東華錄

秋八月白頭趙健殺趙十七以降

先是參將馬某率師圍白頭垂月不克乃使覓十七父墓掘之暴尸烈日中遂羈
十七方登陴官軍發銃擊之傷其目是夜趙健殺之舉衆降

據鄉中
大事記

十一年夏四月官軍會剿烏牙坡餘賊平之

先是官軍攻破開懷香爐山賊巢逆衆竄聚烏牙坡包大肚金幹幹等踞平茶牛
角坡恃險抗命三月提督唐本有分道進剿連克牙塘馬遂猴子坳逆巢龔繼昌
會黔軍進攻烏堡冷水溝等踞匪棄械乞降者以萬計張秀眉等乘雨竄逸官軍
邀擊於挂燈斬逆酋九大白夏四月提督蘇元春分兵由雷公坪搜剿而前斬巖
大五逆首僞大元帥張秀眉僞平楊王楊大六及姜老拉潘老冒等先後被獲鍾
開蘭鄧有德等率黔師攻平茶牛角坡斬馘無算包大肚金幹幹李宰輔及悍苗

都勻縣志稿卷七

年紀

三十九

多名均就禽逆首金大五竄伏香爐山麓白水崗提督唐本有設伏誘擒並獲髮
匪李七苗亂悉平

十二年冬十月苗匪李官保李公雞糾衆復叛提督龔繼昌平之

丹江苗匪李官保結古州逆苗李公雞暗約八寨古州苗衆及散勇作亂破雞講
寨通判屠翰闔門遇害龔繼昌分兵進攻復之賊匪向皆各喬桑烏洛遁去官軍
擊之於哨刀獲李官保李公雞宵遁官軍追及誅之亂平

以上據
東華錄

十三年春三月丹江苗復叛都勻府知府羅應旒平之

先是知府羅應旒薦甘子愚署丹江通判馭下無術故苗民復叛殺丹江營右軍
守備應旒往苗民咸就撫取而伍之遂犒之及醉而殲之死三百餘人脫者二三
人耳

訪稿

德宗光緒二年八寨汛兵變遊擊秦玉佩遇害

時餉絀官弁聚衆要求無所得遂殺玉佩知府羅應旒率兵捕首惡誅之餘衆悉
定

八年冬十二月乙卯復疏劍河

劍河源出都勻東北山澗其下流曰清水江自巡撫張廣泗奏請疏濬後貨舟已
逕達常德苗亂沿岸復壅至是知府鄒元吉以貨賄不通民多坐困復請疏鑿自
陳家庄迄龍王洞互二百餘里爲灘二十有六估帑四千六百兩及冬始事越三
月乃落

十一年三月汰都勻協哨弁

先是黔撫林肇元以度支竭蹶奏裁制兵至是部議併兵節餉署撫李用清以黔
兵難再減惟各哨武弁前未並裁乃議汰提鎮各標協營把總四十一員外委七
十員都勻協汰把總一員外委二員

二十八年春三月乙酉粵匪入寇

粵匪掠平舟知府吳嘉瑞調防營追之弗及置戍而還

三十年冬十月粵匪擾四寨

時粵匪擾邊無虛日知府謝文翹請剿之大府檄統領李寶書宋振鐸率兵會剿
文翹集鄉紳張世忠何學曾蔡澤釗等議設防並令學曾率鄉團三百人往援匪
聞風遁

都勻縣志稿卷七

年紀

四十

冬十二月壬子貴州提督潘萬才率師會剿廣西游匪平之

黔桂接壤游匪肇亂時擾黔邊而都勻獨山荔波尤承其敝頻年籌防無寧日粵
軍剿之敗諸丙妹西山梅寨勢蹙竄踞思恩縣屬之五十二峒冬十一月粵軍乘
勝剿捕遂潰麇集南丹之月里院上稿里茫場各地丙戌悉衆數千人入都勻府
屬四寨關內肆焚劫將下掠獨荔上出定番羅斛以歸隆林老巢四寨防軍中路
新前營管帶儲玉貴新右營管帶劉永鳳率衆禦之失利亡哨長吳國棟滿稚滿
粉白果諸村繼陷獨荔統帶李寶書聞警率兵扼者密遏內竄以親兵哨長涂紫
剛赴援時地方文武及各路防營紛紛告急巡撫曹鴻勛命常備軍管帶宋振鐸
率中右兩營暨先鋒隊馳援檄都勻府謝文翹獨山州張鎬募鄉團助剿咨提督
潘萬才由安順撥提標中左兩營管帶呂調元黃金標率哨會定番待變戊子劉
永鳳儲玉貴復出擊之自晨至午幾不支適涂紫剛李雲峰段綸品各以衆至奮
擊敗之四寨復是夜胡錦棠亦至己丑各軍分五道進攻神仙坡戰竟日亡哨弁
胡玉勝團總羅開榜及練軍三十餘人士卒憤怒大呼猛撲斃匪首十餘人悍匪
三百餘人夜偪賊而壘庚寅戰交綏辛卯大雨雪乘匪無備四設伏密令各軍銜

枚疾進搗其巢賊方抗拒謀傳安順援軍大至遂驚潰退踞虎雄關捷聞鴻勛念黔邊積年匪患老師費財茲邊軍大集粵西勝兵亦至境上宜會剿爲久安計乃電請潘萬才親臨前敵調安義鎮標各營出貞豐以扼上游調古州防營劉全忠鄭綿堂率軍兜剿報可於是潘萬才進駐獨山以李寶書率兵兩營出四寨段綸品劉永鳳佐之王錫吉帥兵三營出荔波成國柱何永昌佐之宋振鐸胡錦棠李雲峰儲玉貴程崧高各率所部分道繼進命劉全忠鄭錦棠軍四寨應援命蔣一忠率提標右前後三營次羅斛邊要上下堵擊十二月丙午宋振鐸儲玉貴劉永鳳進粵西之月里李寶書由月里趨芝場與粵軍統領陸榮廷會己酉進攻斬馘甚多禽匪首五十二黃留芝索二三名獲僞元帥營務處統領各印粵軍禽匪首黃甫臣黃三二名壬子各軍會剿復禽匪首林四陸三何二索老得周十八陳挽著名土匪盧懷春盧添游匪曾五格斃匪魁蘇八自是首要盡除散其脅從黔邊遂寧

三十二年春三月壬辰兩套苗叛

先是大府遇外交案輒以遷就告結爲得策庚子以後益震懾於外力有司承其都勻縣志稿卷七
年紀
四十一
意遇民教涉訟同是蒞民而奉教者輒勝人民積不能平會制科罷黔撫林紹年以興學爲屬吏課最知府潘家懌年少急名不量民力一月之內各鄉建學百三十餘所征鄉民入城練新兵一營費均取給戶捐希旨者因緣訛索各鄉苦之苗民尤甚套苗胡學淵素桀驁見嫉於書役假辦新政構以事家懌不察繫之獄己酉適家懌以祝父壽饗客召套苗至署吹笙擊鼓爲樂苗民蒙恩慶吳錦當張錦波吳桂珍陳玉芳吳廷美劉名得李玉璋吳邦英章良臣等因獲至署偵虛實乘間潛回聚四山五馬六捧苗民數百襲殺蒙介凡介凡廷魁子素結書役魚肉鄉民者也壬子遂以獲賊解官賺入城持械趣府署出胡學淵於獄知縣江若樑聞警馳至諭以順逆衆拜伏始整隊引退

癸巳知縣江若樑飭城防

方套苗劫獄知府潘家懌倉皇出走匿城隍廟套苗引去始歸跼蹐不知所爲若樑會商都司張紹魁部署城守聞苗衆竄東鄉村寨未散若樑及蔡紳澤釗往諭不聽乃趣家懌遺書獨山防營乞援

甲午套苗脅衆來攻千總劉欽和擊走之

套苗蒙恩慶等脅展甲王司各團拂曉聚校場知縣江若樑及紳耆何學會杜錫欽華祝熙王霖等馳至撫慰羣苗請罷苛斂置劣紳蠹書於法議垂成會家懌巡城譟逐之千總劉欽和禦焉殲二人衆奔潰復趣若樑獲所請而退

夏四月己亥家懌罷

家懌罷知府劉寅浚來代王司羊安諸境一日數驚寅浚一意招撫丁未至王司羣苗引避歸報肅清苗匪益肆以聯團滅教爲名結貴定羅發先獨山吳天祥三脚吳承忠及八寨清平都江丹江夷黨約期起事推吳朝俊爲主寅浚弗知也

壬寅吳朝俊率衆掠凱口

朝俊本套苗咸同間擁衆據兩套稱吳三元帥都勻復請降時垂老目失明爲陳玉芳吳錦當及子桂珍所惑復作亂以凱口多教民遣張錦波率衆掠之

甲辰劉寅浚南巡至棗頂遁回

會苗匪自高陔進發各團告警寅浚及南防管帶譚洪興率兵出巡將至棗頂見四山皆匪愕然洪興曰烏合之衆不足懼也宜靜鎮之弗聽夜遁還

夏五月劉寅浚罷

都勻縣志稿卷七

年紀

四十一

凱口教民被掠教士譚尙德意弗慊頗有責言寅浚懼請勦大府意其張皇罷之以知縣江若樑攝府事若樑銳意保息及譚洪興籌防守以左哨長鄧國臣軍城內中哨長黃彥賓軍麥冲右哨長劉元棠軍兔場羊安以何學會及右哨長龍天錫防堵老巢絕其窺伺部署既定人心稍安

六月苗匪掠王司

郡城防守嚴苗民無間可乘遂分道劫掠至爛土官軍迎擊敗之至王司盡掠教民家資若樑聞報馳至招撫苗匪僞應之遂道凱口慰教民卹其家而還

貴東道瞿鴻錫駐節都勻

苗匪變詐百端旋服旋叛教民不遑安處教士譚尙德嚴重抗議大府檄鴻錫駐都勻相機剿撫

冬十月貴東道瞿鴻錫遣兵攻兩套苗克之

鴻錫湖南善化人練達鎮靜套苗變議撫久無成知非痛懲不足集事乃分軍由馬場普壘王司諸道搗毛栗營斬匪首章良臣禽吳邦英吳獻珍誅之朝俊逸

十一月丙申吳朝俊伏誅

官兵搗賊巢朝俊遁走霧露寨畏追襲乘夜奔壩固團紳李德先誘禽之送節署
正法

十二月江若樑至孤六孤掛招撫餘匪

吳朝俊敗吳錦當率餘黨竄獨山與吳天祥謀攻三脚時吳承忠據有孤六孤掛
苗衆鴻錫慮其勢合難制乃命若樑往撫之承忠降

二十三年春正月壬寅苗匪攻獨山知府江若樑擊敗之

獨山毗連廣西游匪時入寇官兵迎擊獲其酋逮州獄東道瞿鴻錫檄若樑往鞠
會苗匪吳天祥吳錦當來攻若樑及譚洪興率官軍敗之州城獲全

瞿鴻錫遣兵剿兩套餘匪

吳錦當敗自獨山結游匪退踞兩套殺保正章開元乘王司無備舉衆焚掠鴻錫
飭哨長黃彥賓鄧國臣率兵進剿以何學曾蔡澤釗率團衆應之有吳繼榮者內
套人素不直錦當等所爲顧脅於勢不敢動至是舉衆內應官兵奮擊敗之錦當
就禽

二月吳天祥伏誅

都勻縣志稿卷七

年紀

四十三

兩套破餘匪竄平舟四寨各地知府王玉麟至檄知縣江若樑管帶譚洪興率兵
撫辦至搖梭獲吳天祥誅之

知府王玉麟率兵剿潰匪張錦波平之

時苗匪張錦波竄伏邊徼時導游匪入寇邊民苦之玉麟率兵入兩套分途捕剿
獲劉老溜楊喬發即戕團紳章開元者也皆斬之張錦波遠竄苗匪悉平

以上皆訪稿

三十四年夏六月癸酉大水

癸酉夜大雨劍河暴漲民居蕩析知府王玉麟發倉穀賑撫勞來安集災民若忘